

.VASEGA FEOLOOLO 2020

**MANATU AOAQ – “SAILI MUAMUA LE MALO O LE
ATUA MA LANA AMIOTONU”**

**IANUARI MA FEPUARI: E LE FAIGOFIE LE SAILI
MO SE MEA LELEI**

IANUARI:

26 Galue ia manuia lou olaga Faataoto 6: 6 – 11
(ASO SA TUPULAGA)

FEPUARI:

2 Ua afio mai Iesu e faaola i tatou
Luka 19: 1 – 10
9 Saili le Atua ma le loto atoa Ieremia 29: 10 – 14
16 Mulimuli ia Iesu ma le alofa Luka 9: 51 - 56
23 Faalogo e manuia ai Esoto 15: 22 - 27

**MATI: FAAMUAMUA LE ATUA I O TATOU
OLAGA**

1 Ia iloa le Atua i taimi uma 1 Tupu 9: 1 – 7
8 Fesoasoani i ē mafatia Mareko 9: 20 - 29
15 Soia le pepelo Kenese 12: 10 – 20
22 ‘Alo ese i le gaoi Efeso 4: 28
29 E alofa Iesu ia te oe ma a’u Ioane 3: 16 – 17

APERILA: IA PAIA LE ALII I LOU LOTO

5 Ua afio mai le tupu o tupu
(Aso Sa Laupama) Ioane 12: 12 – 19
12 E manumalo pea le Alii
(Aso Sa Toetu) Ioane 11: 25 – 26
19 Ia tausii i le Aso Paia o le Alii
Esoto 20: 8 – 11
26 Alu ese mai le leaga 1 Peteru 3: 8 – 12

ME: AVE OU MAFATIAGA I LE ALII

3 Valaau i le Alii mo se lavea’i
Salamo 9: 9 – 14
10 O le tatalo a Hana i le Atua
(Aso Sa o Tinā) 1 Samuelu 1: 9 - 18
24 Ia tumau i lou faatuatuaga Ioane 3: 16 - 18
31 Na o Iesu le fesoasoani sili Salamo 23: 1 – 6

IUNI: IA OLA SAUNIUNI

7 Tapenapena i taimi uma Mareko 13: 32 – 37
14 Ua fememea’i le au so’o Mataio 6: 25 – 34
21 Tatalo ma galue Galuega 20: 35 – 36
28 ‘Aua e te faatamala Kenese 25: 29 – 34

IULAI: IA FAI MA TAITAI LELEI

5	Faalogo i le a'oa'o mai o matua	
		Faataoto 1: 8 – 9
12	Ua faasino e le Alii Filipino i le mea e alu i ai	
		Galuega 8: 26 – 35
19	Leoleo mamoe lelei	Ioane 10: 11 – 15
26	'Aua le faamaualuga	Luka 18: 9 – 14

AOKUSO: E MANAO LE ALII IA TATOU FESOOTAI MA IA

2	Ia tatalo e lē aunoa	Tanielu 6: 8 – 13
9	O le tamā e tūtūmau i le Atua (Aso Sa Tamā)	Iopu 2: 6 – 10
16	Galulue fiafia	Faataoto 31:10-17; 24-28
23	Alu ia Iesu 'aua le fefe	Mataio 15: 21 – 28
30	E faatonu e le Alii i tatou i le mea tatau	Mataio 2: 13 - 15

SETEMA & OKETOPA: IA AMIO SA'O MA AMIOTONU

6	O le Tala Lelei (Aso Sa Tala Lelei)	Roma 1: 1 – 6
13	Ua faalagolago Tavita i le suafa o Iona Atua	1 Samuelu 17:38–50
20	'Aua le ola faalata	Mataio 26: 20 – 25
27	E a'oa'oina tatou mai mea faigata	Iona 2: 1 - 10

OKETOPA

4	Tapenaga o le Lotu Tamaii	
11	Aso Sa Lotu Tamaiti	
18	Malologa Lotu Tamaiti	
25	Ia loto mama	Luka 18: 15 – 17

NOVEMA: IA SUI MA OLA AI

1	Salamo i au agasala	Esekielu 14: 1 – 6
8	Sui ala leaga i ala lelei	Kolose 3: 1 – 10
15	Ta'ita'iina e le alofa	Ruta 1: 1 - 17
22	Tumau ia Iesu	Ioane 8: 31 - 33
29	E mafai e Iesu ona toe faafou tatou	Galuega 9: 1 – 9

TESEMA: IA FIAFIA FAATASI MA ISI

6	O Iesu i le fale o manu	Mataio 2: 1 – 12
13	Se meaalofa sili mo Ia	1 Peteru 4: 7 - 11

**MANATU TAIALA IANUARI & FEPUARI:
E LE FAIGOFIE LE SAILI
MO SE MEA LELEI**

E moomia le a'oa'oina o le fanau ia latou iloa lelei, so o se taunuuga lelei o le ola mo so o se tagata, e mana'omia lava le galue malosi, ma tauivi ma le loto atoatoa, 'aua le faapaie ma faafiti e fetaiai ma faigata. Ia onosai ma faamalosi, ma ia faia mea uma ma le faamoemoe i le alofa o le Alii, e fesoasoani mai i le taumafaiga. O iina e tupu ai le fiafia ma le augofie e galue.

ASO SA: 26 IANUARI 2020 (Aso Sa Tupulaga)

MATAUPU: GALUE IA MANUIA LOU OLAGA

SINI: Ia malamalama le vasega, o le tula'i ma galue e manuia ai lo latou lumanai. Tuu ese le paie ma le faapalapala, auā e mativa ai.

TUSI FAITAU: Faataoto 6: 6 – 11

FESOASOANI MO FAIAOGA:

Faatalofa atu ia te outou le fanau i lenei tausaga fou, aemaise le amataga o a tatou aoga o lenei tausaga fou. Tatou viia lo tatou Alii i lona alofa o lo o tatou maua ai pea le malolosi i o tatou tino, mafaufau, ma o tatou agaga.

Ua amataina a tatou mataupu, i se faamalosi mo i tatou le fanau ia tatou feau ua faagasolo o lenei tausaga. O le tatou mataupu o lenei Aso Sa – '*GALUE IA MANUIA LOU OLAGA*,' ua faamanatu mai ia i tatou le ala e manuia ai o tatou lumanai. O lo tatou toaga i le aoga Aso Sa ma faitau i le Tusi Paia, tatou te maua ai le poto ma le malamalama i le finagalo o Iesu mo i tatou. E oo foi i a tatou aoga a le malo ma Ekalesia. E tataua ona tatou galulue malosi ma toaga, ae lē o le faavaivai ma le

faapalapala. Ua lapataia i tatou e Solomona le poto, e ana le tusi o Faataoto, ina ia tatou tete'e atu i le faaosoosoina o i tatou e le ola paie, le naunau i le moe i taimi e tataua ona galue ai. E lē o le uiga o le a'oa'oga, o le 'aua lea nei tatou malolo. Ua aumai e le Atua le sapatu tatou te malolo ai, aemaise foi i taimi ua maea ai se galuega mamafa na fai. Peitai e le tataua ona tatou momoe i le taimi e tataua ona galulue ai i se feau ua tuu mai e fai.

Ua fa'aaogaina ai e le Faataoto le meaola laitiiti o le 'loi' (ant), e fai ma faataitaiga mo i tatou i le ola paie ma le loto vaivai e faatino se galuega. O se meaola e poto ma toaga e fa'aaoga tataua lona malosi mo mea moomia o lona ola, ina ia tamaoaiga ai. O lana amio tatou te iloa ai le poto o lenei manu, ina ia faapea ona tatou popoto ai foi pe a vaai i ai. E leai sona taitai, po o sona leoleo ma se pule e faatonutonuina o ia. E lē malōlō, aua e tulai ma saunia ana mea e ai i le tau vevela. A oo foi i le tau o seleselega o saito ma isi laau aina, e tulai ma alu e faaputu mai mo le solo lelei o le ola, i le taimi nei ma le lumanai.

Ua a'oa'oina tatou le fanau i lenei mataupu, e finagalo lo tatou Atua ia tatou galulue ma toaga e tauivi i lenei olaga, ina ia tatou maua faamanuiaga mai le Alii. E leai so tatou manuia e maua i lo tatou ola paie ma ola faavaivai gofie. Na o le mativa ma le lē tagolima e oo mai. A e fia maua le poto, toaga i le aoga aua le taala ma mata moe, ae toaga e fai mea aoga. Ia augofie i feau a lou aiga ma usita'i i matua i taimi uma, pei foi o Iesu na auauna i ona matua ma le fiafia.

GALUEGA FAATINO: Faafesootaiga (Matching)

Faafesootai upu o i le Vaega A i o latou uiga faafeagai o i le Vaega E

<u>A</u>	<u>E</u>
1. toaga	taitai
2. valea	selesele
3. auauna	paie

- | | | |
|----|---------|--------|
| 4. | maalili | poto |
| 5. | totō | mativa |
| 6. | tula'i | vevela |
| 7. | mauoa | taoto |

PESE: A'oa'o le pese lea

1. Tulai ma galue, 'aue e te moe
 Tulai ma galue, 'aue e te paie
 Toaga 'aue e te faapalapala
 E manuia ai lou olaga.

2. Tulai ma vaai i le loi poto
 Tulai ma vaai i lana amio
 E galue i le ao ma le po
 Faaputu e le malolo.

(fati – “Tulai ma oso ma vivii i le Atua”)

A'OA'OGA:

1. Toaga e galue ae le o le paie.
2. 'Aua le faavaivai gofie.
3. Ia auauna ma tatalo.

.....

ASO SA: 2 FEPUARI 2020

**MATAUPU: UA AFIO MAI IESU E
 FAAOLA I TATOU**

SINI: Ia malamalama le vasega, o Iesu o
 le Faaola mo tagata agasala.

TUSI FAITAU: Luka 19: 1 – 10

FESOASOANI MO FAIAOGA:

Tamaiti, o le fesili ua masani ai tatou i le Aoga Aso Sa, ”O ai lou faaola?” O lona tali – “o Iesu”. O le uiga o le upu faaola, o le lavea'i mai le leaga ma le agasala. O le afio mai la o Iesu i le lalolagi, o le fia faaolaina lea o i tatou, auā e agasala tatou uma i luma o le Atua.

Ao ui ane la Iesu i lana galuega i le aai o Ieriko, na ia silafia ai ina ua Ia tepa a'e i luga, le tagata oi luga o le laau o le sukamoru. Na ae lenei tagata i le laau, ina ia iloa ifo ai Iesu pe a o ane i lea mea, ona e saasaa o ia. O lona igoa o Sakaio, o ia o le ao lafoga sili ma o le mauoa foi o ia. Na faateia le motu o tagata ina ua fetalai atu Iesu ia te ia, “Sakaio e, ia e vave ifoifo ia i lalo, auā e tatau ona ou nofo i lou fale i le aso nei.” Na muimui tagata uma ua iloa le valaau atu a Iesu ia Sakaio,. Ua latou faapea ane – “Ua alu atu o Ia i le tagata agasala e api ai.” O lo latou taua o Sakaio, o le tagata agasala, ona o lana galuega ‘ao lafoga’. O se galuega e inosia e tagata, auā latou te ao lafoga a le malo o Roma, ma faaopoopo i ai ma se latou foi vaega tupe, ua taugata ai mo tagata Iutaia. O le ala foi lea ua ta'ua ai Sakaio o le mauoa, ona o tupe faasili na te maua mai le fia afe o tagata totogi lafoga.

Peitai, ina ua fetaia'i o ia ma Iesu, na ia malamalama ai, e moomia le toe faasagatonu o lona ola piopio ma le agasala o i ai. O lana tautinoga o le a na vaeluaina atu ana mea i ē matitiva, ma tau i atu e taifa i e na ia aveina a latou mea i se ala pepelo, o le faailoga ua suia lona tagata leaga i totonu ia te ia. O le molimau ua ia talia ma faatuatua ia Iesu e ala i lana amio ua faafouina.

O se a'oa'oga foi lea mo i tatou le fanau mai lea tala, o le mana'o o Iesu, e lē tāua le ta'ua o le tagata o le atalii ma le afafine o Aperaamo, auā e le faaolaina le tagata e lona tupuaga. O lona afio mai i le lalolagi, o le saili i le tagata ua lē iloa i le agasala ia faaolaina. E alofa pea o ia i le tagata agasala ua salamō ma faatuatua moni ia te Ia, ma na taitai ma faasino o ia i lona malo. O le mea foi lea le fanau e, e taua ai lo tatou iloa o Iesu ma talitonu ia te Ia i taimi uma.

GALUEGA FAATINO: Taliga Fesili

Tali mai i fesili nei faatatau i le tatou tala.

1. O le a le galuega a Sakaio?

Tali: O le ao lafoga

2. Aisea na ae ai Sakaio i luga o le laau?

Tali: E vaavaai ifo ai ia Iesu.

3. Aisea na muimui ai tagata ina ua valaau Iesu ia Sakaio?

Tali: Aua o ia o le tagata agasala o le a faatasi ma le Alii o Iesu.

4. O le a le mafuaaga ua ta'ua ai e tagata Sakaio o le tagata agasala?

Tali: Ona o le ola piopio i lana galuega, na te ao faasili lafoga i tagata

5. O a ni faatinoga na faia e Sakaio, e iloa ai ua faaolaina o ia?

Tali: Vaeluaina atu ana mea i tagata matitiva; tau i atu taifa i tagata na ia ave pepelo latou mea.

6. O le a na afio mai ai Iesu i le lalolagi?

Tali: Na afio mai Iesu e faaola i tagata agasala.

7. Afai ua tatou leiloloa i le agasala, e faapefea ona tatou toe foi i le Alii?

Tali: Salamō ma faatuatua i le Alii

PESE: Pese ma Viiga 22 (f 1.)

1 Afio mai ia, Iesu e
Ina afio mai
Ua naunau tele ia te oe
O matou loto nei

Tali: Iesu e, na o oe o lo matou faamoemoe
Le Faaola o le lalolagi nei
Ia pule pea mai, se ia soo atunuu
E olioli tele ai matou.

A'OA'OGA:

1. Talitonu moni i le alofa o Iesu.
2. Ia lagona lo tatou salamo mai le leaga na fai
3. 'Aua e te ola taufaasese i isi.

.....

ASO SA: 9 FEPUARI 2020

MATAUPU: SAILI LE ALII MA LE LOTO ATOA

SINI: Ia malamalama le vasega so o se tagata e fia maua le Alii, e ao ina saili ma le loto atoa.

TUSI FAITAU: Ieremia 29: 10 – 14

FESOASOANI MO FAIAOGA:

O le tatou mataupu o lenei Aso Sa, ua faatatau lea i le uiga o le tusi a le Perofeta o Ieremia, i tagata o sã Iutã o lo o i ai i le tafeaga i le nuu o Papelonía. I le vaega la o lea tusi pei ona tatou i ai, ua logoina ai e le Perofeta tagata, o le finagalo o le Atua, afai e mavae tausaga e fitu sefulu, o le ana toe faafoisia mai latou i Ierusalema. Ia iloa e tagata sã Iutã, e ui ina i ai o

latou taitai i le tafeaga, ae ia latou iloa lelei, e leai se malosi oi ia taitai e toe faafoi ai latou i lo latou nuu, ua na o le Atua lava le taitai sili. O le Atua na te silafia le lumanai manuia o ona tagata, aemaise so latou faamoemoe lelei, auā e le galo ia te Ia ona tagata faatafea.

O le finagalo o le Atua, e ao ina toe fai se amataga lelei i o latou ola, e feliuaina ai o latou tagata tuai ma le agasala, e fai ma tagata fou. E moomia lo latou fiafia e fesootai pea ma le Atua e ala i le tatalo, i so o se taimi e feagai ai ma galuega mamafa. O lona uiga, ia saili ma taumafai ia toe maua le mafutaga ma lo latou Atua, e ala i le faamaoni o o latou loto i lo latou Alii. Ui lava i tiga ma puapuaga i le tafeaga, ae ia le aveesea ai le faasilisiliina o lo latou Alii i so o se taimi. O le tagata e saili ma finau ia ona maua le Alii, e tatau ona alu ma le loto atoa i ai, auā e talia lava e Ia le tagata ua salamo ma faatuatua atu ia te Ia.

O se fafagu taua foi lea mo i tatou le fanau. O lo tatou saili ia maua le poto mai le Alii, e moomia lo tatou saili ma o tatou loto atoa. Tuu ese le faavaivai, le paie, le matamata i telefoni ma le pepelo i matua. Ua fiafia matua e tuu atu outou i le aoga ma fai uma mea o le aoga. O loo tatalo foi matua mo outou. O le mea lea e tatau ai lava ona saili ma faamalosi ia maua le poto. Afai foi ua tatou lē fiafia e o mai i le Aoga Aso Sa ma le lotu, ua tatau nei ona taumafai e saili le Alii, e ala i amioga lelei ma faatinoga tausaaafia e alofagia ai tatou e tagata ma le Atua.

GALUEGA FAATINO: Faatulagaga

Toe faatulaga mataitusi ina ia maua le upu sa’o

1. atuli -
2. lauvaa -
3. saisai -
4. sagatau -
5. niuama -
6. afetaga -
7. aisiafafo -

8. naunauatufia -
9. lamaia -
10. atoatoanafaia -

- Tali:
- | | |
|------------|------------------|
| 1. tulia | 6. tafeaga |
| 2. valaau | 7. faafoisia |
| 3. asiasi | 8. faataunuuina |
| 4. tausaga | 9. malaia |
| 5. manuia | 10. faaatoatoina |

PESE: Pese masani - “Tuitui, tuuitui, o ai o loo i ai”

A’OA’OGA:

1. Tatalo i le Alii i taimi o faigata.
2. E manatu mai le Alii ia i tatou.
3. Fiafia e mafuta i le Alii.

.....

ASO SA: 16 FEPUARI 2020

MATAUPU: MULIMULI IA IESU MA LE ALOFA

SINI: Ia malamalama le vasega, o le tagata ua mulimuli ia Iesu, e ao ina alofa i so o se tagata.

TUSI FAITAU: Luka 9: 51 – 56

FESOASOANI MO FAIAOGA:

Tamaiti, o le tatou mataupu o lenei Aso Sa, o se faamanatu lea mo i tatou i lo tatou taumafai atu ia mafuta ma Iesu lo tatou Alii. E le taua lo tatou faapea ifo – “O a’u lea, ua ou mulimuli ia

Iesu.” E taua lo tatou faatino o uiga faa-Iesu i lo tatou ola, pei o le ola onosai, o le faamagalo, lotomaulalo, alofa ma isi e tele.

Ao agai atu Iesu ma ona soo i Ierusalem, na silafia lelei lava e le Alii, ua latalata mai taimi o ona puapuaga. Le taimi o le a feagai ai ma faiga mataga a tagata agasala ia te Ia, se ia oo lava ina maluu ai. O le ala lava lea o lana galuega faaola na afio mai ai, ma ua saunia foi o Ia mo ia taimi tiga. O le oo atu la o Iesu ma ona soo i le tasi aai o Samaria, na teena ai o Ia ma le talaiga. O tagata Samaria, o tagata totolua. O tagata Iutaia ua faaipoipo atu i tagata o nuu ese. Ina ua pulea e Asuria le malo i matu o Isaraelu, na omai ai tagata ese ua nonofo faatasi ma tagata Iutaia. Na tutupu a latou fanau ma taua ai o Samaria. E tele feteenaiga na tutupu i le va o Iutaia ma Samaria, auā ua fenofoa’i tagata i Samaria.

E ui lava la ina le talia Iesu ma ona soo e Samaria, ae na faasaga atu pea le malaga i Ierusalem. Na tiga so’o o Iakopo ma Ioane ina ua iloa lea mea i tagata Samaria, ona la fai atu lea ia Iesu – “Le Alii e, pe e te finagalo, ma te fai atu ia alu ifo le afi mai le lagi ia fano ai i latou.” O le mana’o o nei so’o, ia faaumatia ma fasiotia tagata Samaria i lo latou teena o Iesu ma i latou.

Tou te iloa tamaiti, na faliu Iesu ma aoa’i atu ia i laua. Ua a’oa’o atu Iesu, o le atalii o le tagata, e lei sau o Ia e faaumatia le ola o tagata. Peitai, ia faaola ia i latou. Na ofo i latou ma latou iloa ai, o le tagata ua mulimuli ia Iesu, e tatau ona maua le alofa. Ia alofa i tagata ua lē alolofa mai. A agaleaga mai, ia alofa pea i ai, aua o le uiga lea e manao ai Iesu, ia ola ai ma faatino e le tagata ua mulimuli mai ia te Ia.

O se a’oa’oga foi lea mo i tatou uma le fanau e, O ai ua ita mai ma faaleaga mai ia i tatou, e tatau lava ona alolofa atu i ai. O le uiga lea faa-Iesu, e finagalo le Alii ia ola ai le tagata ua mulimuli atu ia te Ia. Alofa i so o se tasi pei foi ona alofa mai ai Iesu ia i tatou tagata agasala, ona fiafia mai lea o Ia ia i tatou.

GALUEGA FAATINO: Faatumu avanoa.

Faatumu avanoa i fuaiupu o i lalo i fasi fuaiupu nei:- i le tasi aai, lē talia, matuā faasaga, faliu o Ia, muamua atu.

1. Na oo atu Iesu ma ona so’o i le tasi aai o Samaira, ae na _____ o Ia e tagata.
2. Na iloa e Iesu le upu a Iakopo ma Ioane ma ua _____ ia i la’ua.
3. Ua tuua e Iesu ma ona so’o lea aai, ae agai atu i latou _____.
4. Na _____ atu Iesu i Ierusalem, aua ua lata mai ona puapuaga.
5. Na aauina atu e Iesu nisi ona soo e toalua, e _____ ia te Ia i le aai.

PESE: (Faamanatu le pese –
Love is something that you give it away
Alofa o se mea e te faasoa atu.

A’OA’OGA:

1. Alofa atu pe a agaleaga mai.
2. Ia faamagalo atu.
3. Mulimuli i amioga a Iesu.

.....

ASO SA: 23 FEPUARI 2020

MATAUPU: FAALOGO E MANUIA AI

SINI: Ia malamalama le vasega, o le faalogo i le Atua ma faia lana amiotonu, e manuia ai.

TUSI FAITAU: Esoto 15: 22 – 27

FESOASOANI MO FAIAOGA:

Tamaiti, e taua le faalogo i mataupu ua a’oa’oina ai i tatou, e o tatou matua, o faiaoga ma faifeau ma isi tagata, aua o faasinoga ma faatonuga aoga e manuia ai o tatou olaga. E tatau ona o faatasi lo tatou faalogo atu i o tatou taliga, ma le faatinoina i o tatou olaga o ia a’oa’oga.

Ina ua uma ona sopoia e Isaraelu o le sami ulaula, i le aao malosi o lo tatou Atua, ona tuua ai lea e Mose ma Isaraelu o lea mea ma agai atu i le vao o Sura. E tolu aso o savavali le nuu i le vao ma taunuu ai i le nuu o Mara, ma ua latou lagona foi le fia feinu i le umi o le ala. E ui ina maua le vai i Mara, ae lei mafai ona inumia e tagata i le oona. O le uiga lena o le igoa Mara – “o le oona”. Sa muimui le nuu ia Mose ma faapea ane – “Se a se mea a matou inu ai?” Peitai na tali mai le Alii i le alaga atu a Mose i se fesoasoani, lea na fa’aali ai e le Alii ia te ia le laau e lafoina i le vai ma magalo ai le vai e feinu ai le nuu. O tagata e itiiti le faatuatua i lo latou Atua, pe a tofotofoina i latou e faigata o le ola. Ao i ai pea le nuu i lea mea, na tuuina atu ai e Mose ia Isaraelu o le tulafono (statute) ma le faamasinoga (ordinance) latou te ola ai. Ua ta’u atu foi e Mose ia i latou – Na fetalai mai le Alii – “Afai e te matua faalogo i le leo o le Alii lou Atua, fai le amiotonu i ona luma, ma uai mai ou taliga i ana poloaiga, ma tausi i ana sauniga uma, ona le tuuina atu lea e le Alii o se tasi o ma’i na ia faasalaina ai tagata Aikupito. O le Alii lava lo latou Atua e tausi ma faamaloloina i ona tagata.

Na latou tuua Mara ma oo atu ai le savaliga a le nuu i Ailima, o le nuu o i ai vaipuna e sefulu ma le lua, ma pama e fitugafulu.

GALUEGA FAATINO: (Taliga Fesili)

Tali mai i fesili nei faatatau i le tatou tala.

1. O le a le umi na savavali ai Mose ma Isaraelu i le vao o Sura?
2. Aisea ua le mafai ai ona inu le nuu i vai o Mara?
3. O le a le taua o le laau na fa’aali e le Alii ia Mose, lea na lafo e Mose i le vai o Mara?
4. Afai e faalogo ma fai e Isaraelu le amiotonu, poloaiga ma sauniga uma a le Atua, o le a le taui latou te maua?
5. O fea le nuu na malōlō ma to lauapi ai Isaraelu ina ua latou tuua o Mara?

(Tuu atu pea i le susuga a le faiaoga mo tali o fesili, o loo maua uma i le Tusi Faitau)

PESE: Toe faamanatu pea i tamaiti le pese masani – “Faalogo ma usitai, e leai se isi ala”

A’OA’OGA:

1. Faalogo i a’oa’oga ma faia.
2. E manuia lou olaga pe a e faalogo ma usitai.
3. Ia ola mata’u i le Atua.

.....

MANATU AUTU MATI: FAAMUAMUA LE ATUA I O TATOU OLAGA

O le faamamafa oi lenei masina, o se faasinoga tonu lea o tatou olaga, ina ia faamuamua i o tatou manatu ma lagona lo tatou Atua i so o se mea tatou fai, ma so o se fuafuaga ua faamoemoe i ai. E moomia lo tatou valaau (tatalo) i lo tatou Atua e fesoasoani mai, aua o Ia lava e tauto'alua mai lo tatou vaivai ma faamanuia mai i so o se taumafaiga ua tatou faatino.

ASO SA: 1 MATI 2020

MATAUPU: IA ILOA LE ATUA I TAIMI UMA

SINI: Ia malamalama le vasega, o se tulaga lelei tele lea ia i tatou, pe afai tatou te manatua le Atua mo se fesoasoani i so o se feau tatou te fai.

TUSI FAITAU: 1 Tupu 9: 1 – 7

FESOASOANI MO FAIAOGA:

Ua maea galuega na feagai ma Solomona ma le nuu o Isaraelu, i le fausiaina lea o le maota o le Atua ma le fale o le tupu, ona toe fa'aali mai lea o le Alii ia Solomona, pei foi ona Ia fa'aali ia te ia i Kipeona (1 Tupu 3: 4 – 15). Ua faailoa atu e le Alii ia Solomona, ua Ia talia ma faalogoina lana tatalo. O le tatalo ma le aioi a Solomona i le Alii, ina ia talia ma silasila le Alii i le fale na ia faia, o le nofoaga e afio ai le Alii i taimi uma. O le faapaiaina e le Alii o le galuega na faia e Solomona ma Isaraelu, o le a le gata o le maota e tuu ai lona igoa e faavavau, ae o se nofoaga foi e tulimataia pea e fofoga ma le finagalo o le Atua i aso uma.

O lona uiga, e silasila pea le Alii ia Isaraelu, ma le gasologa o le latou va fesoatai ai ma lo latou Atua i taimi uma. Lea lava na toe faamanatu atu ai e le Alii ia Solomona, tulaga uma o

folafolaga taua na ta'u atu e le Atua i lona tamā o Tavita ma e tupuga mai ia te ia (Tavita) (1 Tupu 2: 1 – 4). Afai e savali Solomona i luma o le Alii pei ona savali ai lona tamā o Tavita, ma le loto sa'o ma le amio sa'o ma faia mea uma e finagalo i ai le Alii, atoa ma le tausia o tulafono ma faamasinoga a le Atua, o le a faatumauina e le Alii le nofoalii o le malo o Isaraelu e faavavau faapei ona i ai ia Tavita le tamā o Solomona.

Peitai afai e liliu ese Solomona ma Isaraelu ma lē mulimuli atu i le Alii, lē tausia ana poloaiga ma ana tulafono na tuu atu i o latou luma, ona faumatia loa lea o i latou ai le fogaeleele na foa'i e le Alii mo i latou. O le fale foi na faapaia e tuu ai le igoa o le Alii, o le a lafoaia. O le a fai Isaraelu ma tauemuga i nuu uma e siomia i latou, aua ua tuua le Alii ae auauna ma ifo atu i atua ese.

Tamaiti, e faamanuia le Alii ia i tatou pe a tatou iloa o Ia i taimi uma. O le iloa o le Atua, o le tatou manatua pea lea ma faia le finagalo o le Atua i taimi uma, e manuia ai o tatou olaga. Peitai, afai tatou te pepelo, le faamaoni ma faagalo le Atua i le tele o taimi o lo tatou ola, o le a galo foi tatou i le Alii ma tauemu foi tatou e tagata. Tumau i lo tatou Alii o Iesu.

Upu Faamalamalama:

- i) Solomona - atalii o Tavita
- Na avea ma tupu lona 3 o Isaraelu e sui i lona tamā
- O ia o se tupu poto
- Na ia fausia le fale o le Atua i Ierusalema.
- ii) tauemuga - (byward) o se tagata ua ulugia e tagata, ma faifai-upu i ai.

GALUEGA FAATINO: (Faafetauiga – Matching)

Faafetaui amataga o fuaiupu i le Vaega A, i o latou faaiuga sa’o oi le Vaega E

- | A | E |
|---|--|
| 1. Na faia e Solomona le fale o le Alii _____ | a. e tuu ai lona igoa e faavavau |
| 2. E faalua ona fa’aali le Alii _____ | e. pei o lona tamā o Tavita |
| 3. Na faapaiaina e le Alii le fale na faia mo Ia _____ | i. pe afai e liliu ese latou mai ia te Ia. |
| 4. Ua finagalo le Alii ia savali Solomona i ona luma. _____ | o. ma le fale o le tupu |
| 5. E faaumatia e le Alii Isaraelu _____ | u. ia Solomona |

Tali: 1. o 2. u 3. a 4. e 5. i

PESE: A’oa’o le pese lea

1. Iloa le Alii taimi uma o le ola.
Tatou uma, tatou uma
Iloa le Alii, manatua o Ia
Ta te maua ai le fiafia
2. Savali i ona ala, i taimi uma lava
Tatou uma, tatou uma
Savali ma le faamaoni i ona ala
Manuia ai le olaga
fati (pese – E alofa Iesu ia i tatou uma)

A’OA’OGA:

1. Manatua le Alii i taimi uma o le ola.
2. O le Alii e alofa mai
3. O le Alii lo tatou fesoasoani.

.....

ASO SA: 8 MATI 2020

MATAUPU: FESOASOANI I Ē MAFATIA

SINI: Ia malamalama le vasega, e finagalo lo tatou Alii ia tatou ola fesoasoani mo nisi tagata e fia maua le fesoasoani.

TUSI FAITAU: Mareko 9: 20 – 29

FESOASOANI MO FAIAOGA:

Tamaiti, e i ai se isi o tatou na fesoasoani i se isi tamaitiiti, po o se isi tagata na mafatia ma fia maua se fesoasoani? (Tuu le avanoa i nisi o tamaiti e faailoa mai ai a latou tali) Lelei tele outou nā. E taua tele lo tatou fesoasoani atu i tagata o fia maua se fesoasoani, pei o ē o mama’i, o ē o maua i faanoanoaga aemaise foi latou o ola i le agasala. O le uiga lena o le tatou mataupu o lenei Aso Sa – *“FESOASOANI I E MAFATIA”*

Ina ua aumai e le tasi tamā, o lona atalii ma’i ia Iesu ina ia faamaloloina, sa taliaina lava e le Alii ma fesoasani i ai. O lenei atalii, ua i ai le agaga gugu. Ina ua iloa atu e ia o Iesu, ona faataafiti loa lea o ia e le agaga, ma pa’ū ai i le eleele. Ua taafilifili solo o ia ma fāuā lona gutu. Na fesili Iesu i le tamā – “Talu mai anafea ona oo o lena mea ia te ia?” Na tali le tamā, “Talu ina o tama itiiti.” Na ia faapea atu foi ia Iesu, “Ua lafo soo foi o ia ia te ia i le afi ... ma le vai ina ia fano ai o ia.” O lona uiga sa manatu lava le tamā ma le aiga, o le pa’ū so’o o le

atalii ma'i i le afi ma le vai, e faaumatia ai le agaga leaga oi totonu o le atalii. Peitai, e lei mafai lava i ia mea, ona malolo ai le ma'i. Na fetalai atu Iesu i le tamā...”E mafaia mea uma lava i le faatuatua.” O lea taimi na alaga ai loa le tamā o le tama – “Le Alii e, ua ou faatuatua; ia e fesoasoani i lo'u le faatuatua.” Le taimi lava lea na fetalai atu ai loa Iesu – “O oe na, le agaga gugu ma le tutuli, ou te fai atu lava ia te oe, ina e alu i fafo ia te ia, 'aia foi e te toe alu i totonu ia te ia.” Na alu i fafo le agaga leaga, a ua liua le tama pei ua oti. Peitai na tago ifo Iesu i lona lima ma faatu ia te ia, ona tulai lea o ia.

Ao matamata ma molimau le au soo o le Alii i le faamalologa na faia e Iesu, na faateia i latou ina ua faaola e le Alii i lenei tagata ma'i. Na latou taumafai foi e tuli ese lea agaga leaga, ae latou te lei mafaia. O lea na fetalai atu ai Iesu ia i latou – “Ua na o le tatalo e mafai ai ona o ese o mea faapena.” O le tatalo o lo tatou fesoataiga lea ma lo tatou Alii. O le ki lea na te tatalaina le faatuatua i o tatou olaga. O le tatalo foi, o le faailoga o lo tatou faalagolago atu i le Alii, ma le agaga maulalo lava ina ia na faatumu i tatou i le faatuatua ma le malosi.

Tamaiti, e finagalo Iesu tatou te fesoasoani i isi tagata. Na ia faasino mai ina ia tatou tatalo atu ia te Ia, ma le faatuatua, aua o Ia lava e fesoasoani mai ma faasino tatou i se mea tatou te fesoasoani atu ai i le ua moomia se lavea'i.

Upu Faamalamalama:

- i) faataafiti - (convulsed) tafiti solo tau le mafai ona taofiofi.
- ii) taafilifili - (wallowed) taavalevale solo

GALUEGA FAATINO: (Taliga Fesili)

Tali mai i fesili nei faatatau i le tatou mataupu.

- 1. O le a le mea na tupu i le atalii ma'i, ina ua na iloa atu Iesu?

- 2. Sa faapefea ona faamaloloina e Iesu lenei atalii ma'i?
- 3. Aisea na le mafai ai e soo o Iesu ona faamalolo le atalii ma'i?

PESE: Fesoasoani i le ua vaivai
Fesoasoani i le ua ma'i
Tatalo ma le faatuatua
Le Alii, e alofa mai ia i ta'ua.

(fati – pese masani) “Savali ma oso ma vivii i le Alii”
(e mafai foi ona faaopoopo e le faiaoga se isi fuaiupu)

A'OA'OGA:

- 1. E mafaia mea uma i le faatuatua.
- 2. Tatalo i le Alii pe a tutupu mea faapea i o tatou aiga.
- 3. Loto fesoasoani pei o Iesu.

.....

ASO SA: 15 MATI 2020

MATAUPU: SOIA LE PEPELO

SINI: Ia malamalama le vasega, o le pepelo e le fiafia i ai le Alii.

TUSI FAITAU: Kenese 12: 10 – 20

FESOASOANI MO FAIAOGA:

Tamaiti, o ai na te iloa le uiga o le upu 'pepelo'? Lelei tele. O le pepelo, o le ta'u atu i le isi tagata o se tala sesē. Faailoa atu i le isi tagata se faamatalaga le sa'o. Ia po o le faasesē o le mafaufau o le isi tagata i se tala ma se molimau lē moni.

i Efeso. E lelei ona tuu ese uiga tuai uma pei o le gaoui mai ia i latou, e iloa ai ua faafouina o latou olaga i le Alii o Iesu. Ia tausi i le faamaoni i le va o le tasi i le tasi, ma ia avea ma tino e tasi ia Keriso. O lona uiga, ia 'auna nei toe pulea e le agasala le loto, ae ia talia le agaga o le Alii, e tupu ai le fiafia i amioga lelei.

Ua ia a'oa'o atu i tagata, o le tagata o faia pea le gaoui, ua le tatau ona toe faia lea amioga mataga. E ao i tagata uma ona galulue ma faamalolosi e atia'e o latou aiga i mea lelei ma aoga mo le ola, e le toe tupu ai le moomoo ma le toesea e nisi o mea totino a isi. O le faamaoni o tagata i galuega a o latou lima o le a maua ai foi le tele o mea e tagolima i ai, aua manaoga o taimi uma. E le gata i lona, ae o le a tupu ai foi le alofa e fesoasoani ma foai atu i tagata matitiva. Ua tatou iloa lava tamaiti le taua o le ola tatou te galulue ai i o tatou aiga. Afai e toaaga o tatou matua e fai le maumaga ma isi faatoaga, tatou te le toe manana'o fua i mea totino a nisi tagata. E tele talo, taamu, fai, ma kapisi ma isi fua o le laueleele tatou te maua, ma o iina foi ua tatou fiafia ai e foa'i atu i nisi tagata ua leai ni meaai, pe faatau foi ma maua ai tupe a le aiga.

Ua a'oa'o mai lenei mataupu ia i tatou, ina ia 'alo'alo ese tatou mai lenei amio mataga o le gaoui. E le gata ina tauvatea ai tatou, ae sili ona le fiafia le Alii i lo tatou faia pea o lenei amioga lelei. Ua tupu pea lenei amioga i o tatou aiga, ma o tatou nuu. E oo foi i totonu o a'oga, e i ai pea nisi tamaiti e maua i lea uiga leaga. Tatau ona tatou fesoasoani i ai i le amio o latou faia, ma ia 'auna nei o tatou faataitai i ai i ia amioga lelei.

GALUEGA FAATINO: Tusitusiga

Tusi mai nisi amioga lelei pei o le gaoui, e le tatau ona faia. (tuu atu pea i le faiaoga e silasila ma faamalamalama nisi o tali a tamaiti)

PESE: Ua ou filifili e mulimuli ia Iesu.

A'OA'OGA:

1. Fai amio lelei e fiafia i ai Iesu.
2. 'Alo ese i le leaga.
3. Faano'i i se mea o e mana'o i ai mai i lou tuaoi.

.....

ASO SA: 29 MATI 2020

MATAUPU: E ALOFA IESU IA TE OE MA A'U

SINI: Ia malamalama le vasega, na afio mai Iesu i le lalolagi ona o lona alofa ia i tatou uma.

TUSI FAITAU: Ioane 3: 16 – 17

FESOASOANI MO FAIAOGA:

Tamaiti, o lo tatou Atua, o Ia o le Tamā alofa ia i tatou uma. O lona alofa foi na te tosina ma taitai mai tagata uma i le mafutaga ma Ia. E manao le Atua ia faatasi tagata uma ma Ia i taimi uma. O le pogai lea na auina mai ai e le Atua lona Atalii pele e toatasi i le lalolagi, ina ia puapuagatia mo a tatou agasala.

O lona uiga e tatau ona tatou faatuatua ia Iesu Keriso, na maliu ma toetu ina ia ola tatou i le ola e faavavau faatasi ma Ia. E lei afio mai Iesu e faamasino tatou i mea leaga ua tatou fai. Pau lava lona faamoemoe, ia faaolaina i tatou ma le lalolagi uma, ina ia tatou i ai faatasi ma Ia i lona malo e faavavau.

Tamaiti, e ese le maualuga o le alofa mai o lo tatou Atua ia i tatou, e le gata i lona foai i mea alofa ua tatou ola ai, ae o le faaolataga mo tatou, pei ona afio mai ai Iesu Keriso. Na maliu o Ia ma toetu manumalo, ina ia tatou ola ma mafuta pea ma Ia i lenei ola, aemaise le ola faavavau.

GALUEGA FAATINO: (Faatumu avanoa)

Faatumu avanoa o i fuaiupu i lalo, i upu nei:- Atalii, faamasino, faatuatua, alofa, faaolaina.

1. O lo tatou Atua, o Ia o le Tamā _____.
2. Na auina mai e le Atua lona _____ ina ia _____ i tatou ia te Ia.
3. E le i afio mai Iesu e _____ le lalolagi.
4. E le fano se tagata e _____ ia Iesu.

PESE: “E alofa Iesu ia i tatou uma”

A’OA’OGA:

E lelei ona ao faatauloto e tamaiti le fuaiupu e 16 o le Tusi Faitau.

“Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi, ina ia lē fano se tasi e faatuatua ia te Ia, a ia maua e ia le ola faavavau....”

.....

MANATU TAIALA APERILA:

IA PAIA LE ALII I LOU LOTO

O le upu “paia” o lona uiga o le tuu ese po o le vavae’eseina lea mai tuinanauga ma fiafiaga faa-le-lalolagi. O lona uiga o se mea e ao ona faatāua, fa’aalologia ma faamamaluina i finagalo ma o tatou loto. O le mata’u i le Alii o le amataga lea o le potu. E tatau ona paia ma māmā o tatou loto ia avea ma malumalu e Afio ai le Alii.

ASO SA: 5 APERILA 2020 (ASO SA LAUPAMA)

MATAUPU: UA AFIO MAI LE TUPU O TUPU

SINI: Ia a’oa’o le fanau, i le taua o le Aso Sa o le Laupama. O le malaga manumalo a Iesu o Ia o le Tupu o tupu agai Ierusalem a tauluga ai lana galuega faa-misionare, e ala i le faaolataga na ia saunia e togiola ai le lalolagi agasala.

TUSI FAITAU: Ioane 12: 12 – 19

FESOASOANI MO FAIAOGA:

Talofa tamaiti. O ai se tamaitiiti o ia manatua, o le a se mea o tupu i le Aso Sa lenei? Ioe, o le Aso Sa o le laupama a tamaiti. O le Aso Sa o le malaga faatupu a Iesu i Ierusalem. O le tatou mataupu o lenei Aso Sa, “*UA AFIO MAI LE TUPU O TUPU.*” Ua leva lava ona valoia e perofeta o le Feagaiga Tuai e pei o Isaia (Isaia 40: 3) Sakaria (Sakaria 9: 9) Mika ma isi, le Afio mai o le Alii o Iesu, o Ia lava o le Tupu o tupu. Pe a ma le fa selau tausga e va ai le Feagaiga Tuai ma le Feagaiga Fou ae peita’i o lea lava na taunuu mea uma e pei ona valoia. O le ata manino lea tatou te mautinoa ai o Ia lava o le Tupu o tupu. O le tusi sa faitauina o lo o faailoa mai ai le alalaga o le motu o tagata ma fola laupama i le ala ua faapea ane, “Osana! Ia manuia le Afio mai i le Suafa o le Alii, o le Tupu o Isaraelu. O Iesu lea ua tietie mai i le tamai asini. O le taunuuga foi lea o le valoaga a le perofeta o Sakaria (Sakaria 9: 9). Ae le gata i lea ua silafia foi e le motu o tagata vavega na faia e Iesu e pei o lona toe faatuina mai lea o Lasalo mai le tuugamau. O le isi lea mea e tulaga ese ai Iesu ma onomea ai ona taua o Ia o le Tupu o tupu, aua e leai se isi tupu e mafai ona ia faia ia vavega.

O le afio mai ai la o Iesu o ia o le Tupu o tupu i Ierusalemā i le taimi o le faamanatuina o le paseka, o le faataunuuna lava lea o le finagalo o le Atua o lē na auina mai o Ia aemaise o le faaolataga na Ia saunia e taualuga ai lana galuega faamisionare i le lalolagi e pei ona afio mai ai o Ia.

E ui lava ina pogisa ma le o gatasi foi ma loto o tagata o ē na manatu e le maliu o ia, ae peitai e tulaga ese lava le finagalo o le Atua e le tutusa ma manatu o tagata, o le ata lena o le Afio mai o le Tupu o tupu na te togilaina agasala a le lalolagi e ala i lona maliu ma lona toetu manumalo mai le oti ma le tuugamau ina ia maua e oe ma a’u ma i tatou uma le ola e faavavau.

GALUEGA FAATINO:

- 1) Faatino le tala o le malaga faatupu a Iesu i Ierusalemā.
- 2) O mea nei e tatau ona i ai, se isi e fai ma Iesu, se isi e fai ma asini e tietie ai Iesu, o nisi e fai ma motu o tagata, latou te alalaga osana ia manuia le afio mai i le suafa o le Alii, e tatau ona i ai nisi e fai ma faesaio, ma se isi e fai ma (narrator) faamatala.

PESE: Osana pepese tamaiti uma

A’OA’OGA:

1. O Iesu, o ia o le tupu o tupu.
2. Ia tatou mulimuli i ala o Iesu.
3. Ia toaaga tatou e tatalo ma vivii ia Iesu.

.....

ASO SA: 12 APERILA 2020

**MATAUPU: E MANUMALO PEĀ LE ALII
(Aso Sa Toetu)**

SINI: Ia a’oa’o tamaiti ia naunau i le ola tauivi ma ia manumalo i le tele o mea faigata, ia tauleleia ai matua, aiga, nuu ma Ekalesia.

TUSI FAITAU: Ioane 11: 25 – 26 (mo tamaiti)
Ioane 11: 25 – 44 (mo le Faiaoga)

FESOASOANI MO FAIAOGA:

E le misi lava i tausaga uma ona tatou faamanatuina le Aso Sa lenei a tamaiti? O le Aso Sa na Toetu manumalo mai ai lo tatou Alii Faaola o Iesu mai le oti ma le tuugamau. O le faailoga o le manumalo pea o Iesu mai le tele o faaososoga leaga o le olaga e oo a i le oti, e manumalo ai pea le Alii.

O le taua lea o le aso lenei ua Toetu ai le Alii o Iesu, lea foi ua tatou faamamaluina tatou te tapuai ai i le Atua. O le ata manino lea o la tatou auaunaga i le Atua manumalo, ia avea ai foi i tatou ma e manumalo faatasi ma lo tatou Alii o Iesu mai le tele o tauiviga faigata o le ola.

Lea lava ua fetalai tuusa’o ma le manino le Alii o Iesu i le tusi sa o tatou faitauina, o ia o le Alii o le toetu. Sa lei talitonu Mareta o le a toe faatuina mai e Iesu lona tuagane o Lasalo, mai le tuugamau. Sa manatu lava ia faatoa toetu mai Lasalo i le aso gataaga.

O le fuaiupu e 35 o lo o tau mai “ua tagi Iesu” O le faailoga o le Alii e tumu i le alofa, na te lagonaina le tiga ma le matuitui faatasi ma e o lo o maua i faanoanoaga ona o le oti. Ioe, o se vavega ofoofogia lea na faia e Iesu i lea aso, ina ua ia toe faatuina mai Lasalo mai le tuugamau, ae ua fa po talu ona i ai o ia e pei ona molimauina e ona tuāfafine. Ae o se faailoga foi lea tatou te mautinoa ai e moni lava e manumalo pea le Alii i mea

uma e oo lava i le oti. O lo o ia te ia foi le pule e faamagalō ai agasala. O i latou uma o e tumau ia te ia e maua e i latou le ola faale-Agaga (spiritual life) e le mafai e le oti ona manumalo ai pe aveesea. E manumalo pea le Alii aua o ia o le Atua foafoa na faia mea uma.

GALUEGA FAATINO:

Faatino le tala e pei ona sa faitauina mai le Tusi Paia.

PESE: Ia tatou faafetai (Pese maViiga 203)

A’OA’OGA:

1. Ia naunau e ola tauivi ma filiga i mea lelei.
2. Ia fiafia e auauna i le Atua manumalo.
3. Tatou te manumalo pe a tatou faamoemoe i le Atua.

.....

ASO SA: 19 APERILA 2020

MATAUPU: IA TAUSI I LE ASO PAIA O LE ALII

SINI: Ia a’oa’o le fanau ia naunau ia ola faapaiaina aua e paia ma silisili ese le Atua.

TUSI FAITAU: Esoto 20: 8 – 11

FESOASOANI MO FAIAOGA:

O le mataupu o lenei Aso Sa – “IA TAUSI I LE ASO PAIA O LE ALII.” O le fesili o le a le aso paia e pei ona ta’ua? Ioe, o le aso paia o le aso lea e sa ona faia ai ni feau po o ni galuega aua o le aso lea ua taua o le Aso Sa, e malolo ai ma tapuai i le Atua.

O le tulafono lona fa la lea e faatatau tonu i le aso paia o le Alii ina ia tausia ma faamamaluina e tagata ola uma. O lo o silafia uma lava le tala o le foafoaga e pei ona faia ai e le Atua mea uma i aso e ono ona malolo ai lea o ia i le aso fitu. O le mafuaaga foi lea e alagata ai ona o tatou tausii i le aso paia o le Alii. E le gata e iloa ai lo tatou usita’i i poloaiga ma tulafono a le Alii, ae maua ai foi lo tatou faasiliga malosi ma ia fai foi lea ma aso tatou te tapuai ai ma vivii i le Atua paia e toatasi.

Ua silafia e le Atua le tele o mea e naunau i ai le tagata ae e tatau lava ona i ai se aso e malolo ai ma vivii ma faafetaia le Atua o lo o aumai ai le ola ma le malosi. E le gata e faafouina ai le malosi i le tino, ae faapena foi ona faafouina ai le malosi ma le ola faaleagaga. E ui la ina tatou te le o fa’aaogaina le Aso Toonai lea e taua o le aso fitu, peitai o lea lava ua tatou faapaiaina ma faamamaluina le Aso Sa, le aso na toetu manumalo mai ai Iesu Keriso e fai ma aso tatou te faapaiaina ma faamamaluina mo le Atua, tatou te malolo mai ai mai feau ma galuega, ae tatou tapuai ma vivii ai lo tatou Alii. O le faailoga o lo tatou auauna i le Atua manumalo, o lo o soifua ma o lo o ola pea e faavavau. O lo tatou tausii i le Aso Paia o le Alii o le faailoga o lo tatou usita’i ma faia lona finagalo.

GALUEGA FAATINO: Faatumu Avanoa

Faatumu avanoa i upu ua tuuina atu (faapaiaina, malolo, faamanuia, Alii, fitu, ‘aua, ono, galuega, manatua, sapati, faia)

1. Ia e _____ le aso _____ e te _____. O aso e _____ e te galue ai, ma fai ai au _____ uma lava, a o le aso _____ o le sapati lea a le Alii lou Atua _____ e te fai ai se galuega e tasi.

2. Aua na _____ e le _____ i aso e ono o le lagi ma le lalolagi, atoa ma le sami ma mea uma lava o i ai, ona _____ ai lea o ia i le aso _____ o le mea foi lea na _____ ai e le _____ le aso sapatu ma na _____ ai.

PESE: Pese ma Viiga 212

A’OA’OGA:

1. Ia usitai i tatou i le finagalo o le Atua.
2. Ia malolo ma tapuai i le Atua i le Aso Sa.

.....

ASO SA: 26 APERILA 2020

MATAUPU: ALO ‘ESE MAI LE LEAGA

SINI: Ia a’oa’o le fanau i mataupu tau i le Alii, ina ia popoto ma atamamai. Ia iloa ona o ese mai mea e leaga ai.

TUSI FAITAU: 1 Peteru 3: 8 – 12

FESOASOANI MO FAIAOGA:

Talofa tamaiti. O le tatou mataupu mo lenei Aso Sa e mafai ona faapea o se faatonuga, po o se lapataiga foi mo i tatou le fanau – “ALO ESE MAI LE LEAGA.” E tasi lea faanaunauga sili i matua, e ala ai ona naunau e a’oa’oina lelei fanau mai lava i le laiti a’o tuputupu ae se ia oo a ina matutua. O apoapoiga i fanau i ni mea faaletonu e leaga ai i latou.

O le taua lea o le faamanatu mai po o le apoapoai mai o Peteru i le tusi sa faitauina. O lo o taua e Peteru nisi o uiga lelei e ao ona faia e i tatou le fanau e pei o le loto gatasi (harmony) o le

fealofani (sympathy) o le alofa (love), o le agalelei (compassion), atoa ai ma le lē tauimasui po o le loto maulalo (humility). O nisi ia o uiga lelei e ao ona o tatou faatinoina e iloa ai o fanau i tatou a le Atua. ‘Aua foi tatou te tautatala i upu leaga ma upu faa’ole’ole auā e le finagalo ai le Atua. Ia tatou ‘alo ese mai le leaga, a ia fai mea lelei, ia saili i le filemu ma tausisi i ai. Ioe tamaiti, afai tatou te faatino ia uiga lelei uma ona o tatou maua lea o le ola, ma tatou iloa aso lelei, o faamanuiaga ia a le Atua mo tatou. O le taua po o le aoga lea e tata ai ona o tatou alo ese mai le leaga. O le upu moni e silafia e le Alii mea lelei uma tatou te faia e mautinoa foi e faasaga mai ona fofoga e talia so o se mea tatou te faatoga pe tatou te ole ma tatalo atu ai ia te Ia. E faamanuia mai foi o Ia ia te i tatou. Tamaiti ia tatou alo ese mai le leaga e manuia ai tatou.

Uiga o Upu:

- i) agatele - tau ma sui
- ii) faaoleole - tala pepelo
- iii) tausisi - tumau

GALUEGA FAATINO: Faafetauiga (Matching)

Faafetaui upu i o latou uiga o lo o i lalo

- | | |
|--------------------------|--|
| 1. loto gatasi (harmony) | (a) lotomau lalo/le tauimasui |
| 2. fealofani | (e) vaai i isi pei o se uso ma se tuafafine ia te oe |
| 3. alofa | (i) malilie uma i se mea e tasi |
| 4. agalelei | (o) saunia e talia manaoga i isi uso |
| 5. agamalu | (u) loto fesoasoani/ agaalofa |

PESE: Fai mea tonu ma mea lelei

A’OA’OGA:

1. Ia fiafia e fai mea sili.
2. Alo ese mai mea leaga.
3. Ia usita’i i le finagalo o le Atua.

.....

MANATU TAIALA ME: AVE OU MAFATIAGA I LE ALII

O le olaga nei e le tumau i se mea e tasi. O taimi ua lelei o taimi foi ua poia i tatou i puapuaga ma mafatiaga. E pei lava foi o le tulaga i le tau (wheather) o taimi ua la, o taimi foi ua mamafa timuga. A o le mea mautinoa mo i tatou o Kerisiano, e i ai lo tatou fa’aa, o le Alii lea, o ia o le Ao o le Ekalesia. O ia o le puna o manuia ma le pogai o lo tatou ola. O lea foi o lo o manino i nisi, o upu o le lauga a Iesu (Mataio 7: 7) ina ia tatou ole atu i le Atua mo so o se mea tatou te mananao ai ona o tatou maua lea, o lona uiga afai tatou te ole atu ma le faatuatua ma ave o tatou mafatiaga i le Atua e ala i le tatalo, ona tatou maua ai lea o le fesoasoani mo i tatou.

ASO SA: 3 ME 2020

MATAUPU: VALAAU I LE ALII MO SE LAVEA’I

SINI: Ia a’oa’o le fanau ia malamalama e i ai auala e mafai ona o tatou valaau i ai mo se lavea’i, i taimi faigata, ae ia aua lava nei galo o le Atua o le lavea’i sili lea mo tatou ola.

TUSI FAITAU: Salamo 9: 9 – 14

FESOASOANI MO FAIAOGA:

O le Salamo sa faitauina o le Salamo a Tavita. O le Salamo o lo o vivii ai Tavita i le Atua ona o lona faasaoina o ona tagata mai le tele o faigata ma puapuaga e oo mai. O Tavita o se tagata e talitonu tele ma faatuatua i le Atua. O le ala foi lea na valaauina mai ai lava o ia e fai ma tupu o Isaraelu, ao lo o leoleo mamoe o ia i mamoe a lona tamā o Iese. O se taugologolo taua foi lea mo tagata uma, auā ua matuā talitonu atoatoa Tavita i le alofa lavea’i ma le alofa tausi o le Atua i e auauna ma faatuatua faamaoni i le Alii. E le tuulafoa’iina i latou e Ia. A tatou manatu i le faatoilaloina ai o Koliata e Tavita, e matua maoa’e lava ma ofoofogia. Aua ua na o Tavita o se taulealea faatauavaa i na ona po, ao Koliata, o ia lava o le toa malosi o Filisitia. Ae fai mai e a Tavita? “E te sau ia te au ma le pelu ma le tao, ma le tao leoleo, ae ou te alu atu ia te oe i le Suafa o le Alii.” O le a le iuga? Sa manumalo Tavita auā sa faalagolago ma famoemoe Tavita i le Atua, o lona malosiaga lea.

O le Salamo la lea sa faitauina o lo o ua vivii ai Tavita ma faailoa le alofa tausi o le Atua i ona tagata. Fai mai a ia i le fuaiupu e 9. “O le Alii o le olo maualuga mo le ua faasauaina, o le olo maualuga i ona po e iai le puapuaga.” Ioe, o le olo o se mea e mafai ona faamalumu pei o se pa malosi e mafai ona lavea’iina ai oe mai ni auupega o taua e ono afaina ai lou ola. Ioe, ua faatusa i ai e Tavita le Atua, o Ia o le olo tatou te malu ai i taimi o mafatiaga ma puapuaga. O le taua lea o le ave o o tatou mafatiaga i le Alii, ia tatou saili ia te ia ma le faatuatua faamaoni auā na te lē faagaloina le tagi o e ua puapuagtia ma mafatia i avega mamafa. O le mea lea e taua ai lava lo tatou valaau i le Alii mo se lavea’i i taimi e lutia ai i tatou i puapuaga ma faigata.

Ia tatou fiafia pea e auauna ma faailoa atu lona matagofie, atoa ai ma lona mamalu i isi o tatou uso o lo o maua pea i le faavaivai mo le ola faatamala, e ala i lo tatou galulue, tatalo i le Alii mo se lavea’i i taimi faigata o le ola.

GALUEGA FAATINO: Tusitusiga

Tusi mai sau solo po o se pese, e lua pe tolu fuaiupu e tai ono laina i le fuaiupu e faatatau i le tatou mataupu (Valaau i le Alii mo se lavea’i)

PESE: Pese ma Viiga 134

A’OA’OGA:

1. O le Alii o lo tatou ‘olo ia ma lo tatou maluapapa
2. Ia talitonu ma faatuatua faamaoni i le Alii.
3. Valaau i le Alii mo se lavea’i e ala i le tatalo.

.....

ASO SA: 10 ME 2020

MATAUPU: O LE TATALO A HANA I LE ATUA
(ASO SA TINĀ)

SINI: Ia a’oa’o le fanau ia fiafia e ola tatalo. Ia ta’u atu i le Atua so o se mea o mafatia ai ma manaomia ai se fesoasoani.

TUSI FAITAU: 1 Samuelu 1: 9 – 18

FESOASOANI MO FAIAOGA:

Tamaiti, o le tatou mataupu ua atofaina mo lenei Aso Sa “O le tatalo a Hana” O Hana o le toalua o le tamaloa e igoa ia Elekana. E leai sana fanau, ae e i ai le fanau a Elekana i le isi ona toalua e igoa ia Penina.

O le mafuaaga lea sa fai ai lava ma avega mamafa i le mafaufau o Hana le tau-faifai po o le ulagia so’o o ia e Penina. O tu ma

aga ia faa-Iutaia i na ona po, afai e le fanau se fafine ia po o ua oti foi lona toalua, ona vaai maulalo lea i ai pe vaai faatauavaa i nai fafine nei, peitai sa lei avea lea itu ma ala e loto vaivai pe solomuli ai le ola faatuatua o le tinā ia Hana.

O mafatiaga ia o Hana na ia naunau ai lava ma ia tatalo ai loa i le Atua ina ia foa’i atu se tama mo ia. O le tatalo a Hana i le Atua, afai o le a ia foa’i mai se tama mo ia, e na te toe ofoina atu o ia i lana Afio e fa’aaoga mo lana galuega. O le tatalo a Hana fai mai na o na memu lava o onā laugutu ae le lagona sona leo. O le ala lea na manatu ai Eli le ositaulaga, ua onā o ia, peitai, sa faailoa lava e Hana ia Eli, e leai, e le o onā o ia, ua ia tuu atu atoa lona loto i le Atua i lana tatalo, e tusa ai ma lona mafatiaga. Fai mai, ua faamanuia atu foi le ositaulaga o Eli ia Hana ma lana tatalo ona fiafia tele ai lea o ia. Ioe, o le iuga o le tala, sa foa’iina lava e le Atua ia te ia le tama tane lea na faaigoaina o Samuelu, lea na avea ma ositaulaga, na avea ma perofeta, ae na fai foi o ia ma faamasino o le nuu o le Atua. O le taua lea o le tatalo e faia ma le loto talitonu ma faatuatua faamaoni i le Atua, ae le gata i lea o le fiafia e ositaulaga i le Atua e pei ona faia e Elekana.

Ua tatou iloa ai foi, e leai se mea e faigata i le Atua. E mafaia e Ia ona faia o so o se mea. E taua le saili fesoasoani i le Atua ae le gata i lea, ia tatou faamaoni i a tatou tautoga (vow) e faia i le Atua faapei ona fai e Hana, na ia toe ofo lava Samuelu i le Atua mo lana galuega.

GALUEGA FAATINO: (Faatino le tala – 1 Samuelu 1: 1 – 28)

- Tagata e tatau ona i ai:-
- i) Penina ma le fanau
 - ii) Hana
 - iii) Elekana
 - iv) Eli

PESE: Pese ma Viiga 122

A’OA’OGA:

- 1. Ia saili fesoasoani i le Atua.
- 2. Ia fiafia e ola tatalo.

.....

ASO SA: 24 ME 2020

MATAUPU: IA TUMAU I LOU FAATUATUAGA

SINI: Ia a’oa’o le fanau ia tumau, talitonu ma faatuatua faamaoni ia Iesu, o Ia o le Ala, upu moni ma le ola tatou te manuia ai.

TUSI FAITAU: Ioane 3: 16 – 18

FESOASOANI MO FAIAOGA:

O le upu faatuatuaga (belief) o le nauna e maua mai i le upu faatuatua (believe). O le tumau, o lona uiga ia mauaa (firm). O le tatou mataupu la o lenei Aso Sa- “Ia tumau i lou faatuatuaga” o lona uiga e le tatau ona maluelue pe mamulu ese lou talitonuga i le Atua.

O le tusi faitau mo le tatou mataupu lenei, o le ogatotonugalemu (core) lea o le Tala Lelei ia Iesu Keriso, e pei ona iloa ai i le Ioane 3: 16. O le uiga o le tala, o le augaoaute lea ma le faamoemoe o le afio mai o le Alii o Iesu i le lalolagi. O le faataunuaina lava lea o le finagalo o lona Tamā, e ala i le faaolataga mo le lalolagi agasala.

Tamaiti, o le upu moni e leai lava se isi ala po o se isi malosi tatou te maua ai le ola, aemaise o faamanuiaga mo i tatou, ua na o Iesu lava o Ia o le ala, upu moni ma le ola e tatau ona tumau ai lo tatou faatuatuaga ma lo tatou talitonuga, aua e leai lava se isi alofa e sili i lenei alofa ina ua ia ofoina mai lona ola e sui ai tatou.

Aua nei avea lo tatou poto po o le malosi po o le tele o mea tatou te maua, ona o tatou faagalo lea o le alofa na uluai fai e le Atua mo oe ma au ma i tatou uma.

O nisi ua maua galuega lelei ma mea e tele ona faatuatuanai lea o le ola faatuatua na amata mai ai ma maua ai manuia, a’o mea ia e mavae e gata i lalo nei.

Peitai, o le faamoemoe ola lea mo i tatou o Kerisiano, ia faaolaina i tatou i le ola e faavavau, pe a mavae atu le ola nei. E leai se aoga tatou te maua ai mea e tele ae tatou te lē sao atu i le ola e faavavau, pe afai e maluelue ma lē maua’a lo tatou ola faatuatua i le Atua,.

Tamaiti, e matuā manaomia le tumau i lou faatuatuaga i le Alii o Iesu, tatou te ola ai aemaise i tua atu o le ola o lo o i ai le ola e faavavau.

GALUEGA FAATINO: Taliga fesili

- 1. O le a le uiga o le upu faatuatua?
Tali: O le talitonu ma faamoemoe i mea e le o vaaia e mata, e manuia ai i le lumanai.
- 2. O le a se upu faa-Samoa e tutusa ma le upu o le lē tumau i le faatuatuaga e tasi ?
Tali: O le maa e tavalevale solo e le pipii ai se limu.
- 3. O le a se mea tatou te maua pea tatou tumau i lo tatou faatuatuaga ia Iesu?
Tali: Tatou te maua le ola e faavavau.

PESE: “Ou te tumau ma pipii mau”

A’OA’OGA:

- 1. Tumau ia Iesu tatou te ola ai.
- 2. Talitonu ma faatuatua faamaoni ia Iesu
- 3. Aua nei faaseseina tatou i nisi talitonuga ese.

ASO SA: 31 ME 2020

MATAUPU: NA O IESU LE FESOASOANI SILI

SINI: Ia a'oa'o le fanau ia ola matata'u i le Alii, auā o ia tatou te maua ai le fesoasoani i so o se mea tatou te manaomia.

TUSI FAITAU: Salamo 23: 1 – 6

FESOASOANI MO FAIAOGA:

Talofa tamaiti. O ai na te iloa le tagata na tusia le Salamo lenei e 23? Ioe, o Tavita lea sa avea ma tupu logologoā o le nuu o Isaraelu ina ua mavae atu Saulo sa avea ma uluai tupu o Isaraelu.

O le Salamo lenei e 23, ua faatusaina ai e Tavita le Alii i le leoleo mamoe. Silafia e Tavita o le galuega faaleoleo mamoe, o le tausia lelei lea po o le fafagaina o mamoe, ae le gata i lea, na te ta'ita'iina foi mamoe i lafanua e maua ai se vao lelei, faatasi ai ma se vai e feinu ai mamoe. O lana galuega foi o le puipuiina ma le vaavaaia lelei lea o mamoe ina ia saogalemu mai le fili, ia po o manu feai, ina nei faatamaiaina le latou ola. O lona tomai i lana galuega sa fai ao talavou o ia.

O le ala tonu lea ua faatusaina ai e Tavita le Alii i le leoleo mamoe aua o lona fesoasoani sili lea, o le Alii. Fai mai a ia o le Alii o lona leoleo mamoe o ia. “E leai se mea e mativa ai,” o lona uiga o le Alii na te saunia ma foa'i atu so o se mea e manao ai o ia e ola ai. O le faailoga o le tagata ua talitonu atoatoa lona agaga i le Alii. O le Alii o lona ta'ita'i ia, na te ta'ita'iina o ia i ala o le amiotonu, (ola faaleagaga). O lana faamoemoega atoa o le Alii lea. Pe savali lava o ia i le vanu o le ata o le oti e le fefe lava ia i se mea e tasi, auā o lona fesoasoani sili o le Alii lea. O lona talitonuga o lo o auai faatasi le Alii ma ia, (omnipresence) i taimi uma ma aso uma o lona ola. O le Alii o lona malosiaga, auā o le Alii e ou le malosi uma lava (Omnipotence)

Ua matua talitonu atoatoa Tavita i le agalelei ma le alofa o le Alii ia te ia aemaise ia i latou o e usita'ia ma faia lona finagalo. O i latou foi ia e mau faatasi ma le Alii i le maota o le Alii e faavavau.

Tamaiti ia tatou faapei o le manatu o Tavita, ia tatou manatua pea ua na'o Iesu lo tatou fesoasoani sili. O Ia na te saunia ma faia mea lelei mo i tatou. O ia na te taitaia i tatou i ala ma mea lelei uma. O Ia na te puipuiina ma lavea'iina i tatou mai le fili ma le tiapolo e taumafai e faasese ma faaleaga i tatou.

GALUEGA FAATINO: Tusitusiga

Tusi mai sau solo po o sau pese e lua fuaiupu (parakalafa) e ta'u mai ai ua e talitonu na'o Iesu le fesoasoani sili mo i tatou)

PESE: Iesu taitai oe (Pese ma Viiga 199)

A'OA'OGA:

1. E tausia ma puipuia i tatou e le Alii.
2. Ia tatalo i le Alii mo se fesoasoani.
3. Ia talitonu ma faalagolago i le Alii.

.....

MANATU TAIALA IUNI: IA OLA SAUNIUNI

E tele tala i le Tusi Paia aemaise o le au fai Evagelia o lo o talanoa ai Iesu i faataoto e uiga i le taua o le ola sauniuni (Luka 12: 35 – 48) E taua i le finagalo o Iesu le ola sauniuni ma mataala i le olaga nei aua e i ai lava le fili ma le tiapolo e taufaaleagaina le soifua faatuatua o tatou o Kerisiano (Luka 21: 34 – 36)

ASO SA: 7 IUNI 2020

MATAUPU: TAPENAPENA I TAIMI UMA

SINI: Ia a’oa’o le fanau ia mataala ma ola tapenapena i taimi uma. Ia alo ese mai le leaga a ia fiafia e ola i ala o le Alii.

TUSI FAITAU: Mareko 13: 32 – 37

FESOASOANI MO FAIAOGA:

O le mataupu o lenei Aso Sa “*TAPENAPENA I TAIMI UMA.*” O lona uiga ia mataalia ma mataala i taimi uma. E le manaomia ai se olaga paie ma le faapalapala po o le matamoe foi, auā e tasi lea natura faale-tagata ua fai ma vaivaiga o le toatele o i tatou, o le fiafia e ola i se olaga faafifilemu. E le manao e tigaina umi i se mea, ae fiafia e talia faamanuiaga e maua atu i nisi.

O le mea lava e ao ona manatua, ua uma ona tuuina mai e le Atua le matupalapala po o le matafaioi i le tagata e pei ona i ai i le tala o le foafoaga. O le tofiga lava ia o tatou o le ‘ai ma le afu o mata. E mana’omia le galue ona maua lea o faamanuiaga o le tauu poo fua o galuega e seleseleina mai. E faapena foi i le soifua ma lo tatou ola faale-Agaga o lo o tauivi pea ma le au Kerisiano i nei ona po. E le manaomia ā se ola faafifilemu. Lea lava e faamanatu mai pea e Iesu le taua o le mataala ma tatalo i taimi uma, aua o le fili ma le tiapolo e taumafai mai lava i taimi uma e faasese ma faaleaga le tagata faatuatua. O le mafuaaga lena e tele ina fa’aaoga mai ai e Iesu le tele o faataoto e pei o le tusi sa o tatou faitau i ai. Ua tofia e le matai ana auauna i galuega latou te faia, faatasi ma le na te vaai i latou ona alu malaga lea o ia. E lei iloa e auauna le aso e toe foi mai le matai, a o se tofotofoga lelei lea mo i latou e iloa ai e le matai po o ai e ola sauniuni ma tapenapena i taimi uma e faatali atu i lona toe afio mai. O le a e tapenapena i taimi uma ma mataala e maua e ia faamanuiaga e tele mai lona matai.

GALUEGA FAATINO:

Taliga Fesili

1. O a ni aafiaga o le ola faatamala ma le ola paie i olaga o tagata soifua?

Tali: mativa, le tagolima, aisi

2. Aisea e manaomia ai le ola tapenapena ma sauniuni i taimi uma?

Tali: E maua ai faamanuiaga ma le tauu lelei.

3. O le a le galuega a le tiapolo e fai, ao ai le matai e tatau ona tatou faalogo i ai?

Tali: O le tiapolo e tau faaleaga ma tau faasese. Tatou faalogo ia Iesu.

PESE: Tulei ese x 3

A’OA’OGA:

1. Ia mataala ma tatalo i taimi uma.
2. Fiafia e sutesue ma savali i ala o le Alii
3. O Iesu lo tatou matai sili.

.....

ASO SA: 14 IUNI 2020

MATAUPU: UA FEMEMEA’I LE AUSO’O

SINI: Ia a’oa’o le fanau ia faamuamua le ola talitonu ma faatuatua i le Alii, ae aua le naunau i mea faatauvaa o le olaga nei e le maua ai se to’afimalie i o latou loto.

TUSI FAITAU: Mataio 6: 25 – 34

FESOASOANI MO FAIAOGA:

Ua silafia lelei e Iesu le natura faaletagata, ma o le tulaga foi lea o lo o tupu i lona au-soo. O le auga o aute lea ma le faamoemoe o le lauga a Iesu i le mauga, ina ia a’oa’oina ai lona au so’o i le tulaga o le popole i mea o le olaga nei e pei o meaai, vaiinu, o lavalava, galuega ma mea matagofie eseese. Ua aumai ai e Iesu faaitaiga ina ia latou vaavaai i le natura o le foafoaga, i manu felelei faatasi ai ma laau, po o vao i le laufanua. E tausia ma fafagaina e le Atua i latou. E faia foi e le Atua mea silisili ma le matagofie mo i latou.

O lo o manino lava i le fetalaiga a Iesu, e sili atu le alofa o le Atua i le tagata nai lo o manu ma isi mea o le foafoaga. E sili atu foi ona tausia lelei e le Atua le tagata aua o lona faatusa ma o le palealii o ana galuega mamana. Pau a o lea ia muai saili atu le tagata i le Atua ma lana amiotonu ona faaopoopoina lea o mea na te maua mai le Alii.

E lē mafai e le popole ma le fememeai ona faaopoopo se aga po o se kupita se tasi e ola ai le tagata. Ua na o le Atua e mafai ona tatou maua ai so o se mea e tausia ai lo tatou ola ma faaumiumi ai o tatou aso i lenei lalolagi. Ia tatou fa’aaoga tatau lo tatou ola mo le Alii auā e tausia lava i tatou e ia. Aua tatou te polepole vale i mea e tausia ai lo tatou ola ma mea tatou te oofu ai, auā e tausia lava i tatou e le Alii. O le popole e aveā ma ala tatou te fememeai ai ma tatou lē mautonu ai, ae afai tatou te muai saili atu i le Alii ma lana amiotonu, ona tausia lava lea o i tatou e ia, ma ia faaopoopo mai faamanuiaga e tele mo i tatou aemaise ia tatou saofaga atu i lona malo e faavavau.

GALUEGA FAATINO: Faafetauiga

Faafetaui uiga o upu ma o latou uiga tutusa.

- | | | | |
|----|--------------|----|-----------------------|
| 1. | fememea’i | a. | tausia |
| 2. | matagofie | e. | ufiufi |
| 3. | fagaina | i. | teu |
| 4. | faaputu | o. | le mautonu/popolevale |
| 5. | faaofu | u. | matalasi |
| 6. | saili | f. | faateleina |
| 7. | faaopoopoina | g. | su’esu’e |

Tali: 1. o 2. u 3. a 4. i 5. e 6. g 7. f

PESE: Aua le fefe pe faavaivai

A’OA’OGA:

1. E puipui ma tausia i tatou e le Atua.
2. Saili i le amiotonu a le Atua tatou te ola ai.
3. Aua le popole i mea faatauvaa.

.....

ASO SA: 21 IUNI 2020

MATAUPU: TATALO MA GALUE

SINI: Ia a’oa’o le fanau ia fiafia e ola tatalo ma filiga i a’oa’oga ma so o se galuega tau i le Alii, e tupu tele ai ma malosia ai le ola.

TUSI FAITAU: Galuega 20: 35 – 36

FESOASOANI MO FAIAOGA:

E leai lava se isi auala e aupito i sili ona aoga e faatupuina ai le soifua faatuatua, ua na o le ola tatalo ma galue, ae afai e tatalo ae aunoa ma ni galuega e lē mafai ona iloa le aogā o lau tatalo pe a le faatinoina se galuega lelei mo nisi.

I le tusi o Galuega a le au Aposetolo sa faitauina, o lo o apoapoi atu ai Paulo i Kerisiano po o faifeau i le Ekalesia i Efeso. O lo o faamamafa e Paulo le ola galulue ma le ola fesoasoani i e vaivai, aemaise ia tausisi i Afioga a le Alii. O galuega fai-faatasi ia a i tatou o Kerisiano e pei foi ona faia e le au Aposetolo, o le folafolaina lea, ma tala'i le finagalo o le Atua e ala ai le Tala Lelei ia Iesu Keriso. E o faatasi le tatalo ma galuega ae faamoemoe i le Agaga Paia e fesoasoani e faataunuaina manuia taumafaiga e atina'e ai le galuega a le Atua.

Ua silafia e Paulo e oo lava lana malaga o lo o sauni atu i ai mo Ierusalem. O le tatalo a le au-uso Kerisiano e fesoasoani ai ia Paulo auā ua ta'ua e Paulo o le a oo puapuaga ma sauaga mamafa ia te ia ona o lona molimau i le suafa o Iesu o se tulaga e lē fiafia ai tagata Iutaia o i Ierusalem. Peitai, e ui a i puapuaga ma faigata o le a oo ia Paulo ae lei fefe ai pe vaivai ai le faatuatua ma le molimau a Paulo i le Tala Lelei ia Iesu Keriso. Sa faatino pea lava e Paulo lana galuega faa-Aposetolo faatasi ai ma lona tuu atu i le Atua o mea faigata uma e ala i le tatalo.

Tamaiti ia tatou fiafia e fai galuega mo le Atua ma ia tatou faamalolosi e ala i le tatou toaaga e tatalo i le Atua e le aunoa, ina ia malosi ma atoatoa lo tatou ola faatuatua i le Atua, tatou te lototele ai e fai so o se mea lelei e auauna ai mo e vaivai ma fia maua se fesoasoani atoa ai ma le auaunaga sili mo le Atua.

GALUEGA FAATINO: Tusitusiga

Tusi mai sau solo, po o sau pese e faatatau i le taua o le ola tatalo ma galue (2 parakalafa, tai 4 pe ono foi laina i le parakalafa)

PESE: Galue ia seia uma ai.

A'OA'OGA:

1. Ia toaga e tatalo i le Atua
2. Ia fiafia e galue mo le Alii
3. Ia faatuatua i le Atua e te'a ai le fefe.

.....

ASO SA: 28 IUNI 2020

MATAUPU: AUA E TE FAATAMALA

SINI: Ia a'oa'o le fanau ia ola faaeteete ma faautauta lelei, ia filiga i mea e lelei ai, nei mau mau le ola ona o le faatamala.

TUSI FAITAU: Kenese 25: 29 – 34

FESOASOANI MO FAIAOGA:

Tasi lenei o tala iloga i le Tusi Paia ua masani ai tatou ona faalogo soo i ai. O le tala i le au-uso e toalua o Esau ma Iakopo, le fanau a Isaako ma Repeka. Ae manatua foi o Esau o le ulumatua, ao Iakopo le uii. Peitai i tu ma aga faa Iutaia, o le ulumatua lava na te mauaina faamanuiaga e tele i le vaeveaga o aseta po o measina a aiga aua o ia ua ta'ua o le alii o aiga, e soso'o i le tama.

O lo o manino i le tala, e eseese taleni a tama nei, o Esau o lana taleni o le tulimanu a’o Iakopo o le fai fale lana taleni. O le tasi la aso na foi mai ai Esau mai lana tuliga manu, ua lagona lava lona fia a’i, ona ia faatoga lea ia Iakopo mo se meaai ma ia. O le avanoa lea na fai ai Iakopo ia Esau e faatau atu ia te ia le tofi o le ulumatua. Talu ai ona ua naunau tele Esau i le fia taumafa, o lea na ia ioeina ai le manaoga o Iakopo e faatau atu ia te ia lona tofi o le ulumatua.

Talofa ia Esau i lona faatamala lea ua ia foai ai ona faamanuiaga i lona uso laitiiti o Iakopo, ona o le fia faamalieina o lona manao i lona galala i le fia ai. Ua manatu i lona fia’ai i sina taimi puupuu ae ua galo ai faamanuiaga e le toe maua mai. Ua ia mele faamanuiaga sa ia te ia ona o lona ola faatamala. O lona iuga e ola falolo ma pologa ona o le faatamala lava i faamanuiaga. E moni ai le alagaupu faa-Samoa “Ua sau Apaula ua tautua.” O lona uiga ua auauna le uso matua i le uso laitiiti, o se mea e le tatau ona tupu, ae ona o le faatamala lava ua mafua ai ia tulaga uma.

Tamaiti ia tatou faaeteete ma faautauta i o tatou tofiga ma faamanuiaga mai le Atua nei aveesea ona o lo tatou ola faatamala.

GALUEGA FAATINO: Faatino le tala

Ia lelei se isi e fai ma faamatala (narrator), o se isi e avea ma Esau, ma se isi e fai ma Iakopo.

PESE: Pese ma Viiga 119

A’OA’OGA:

1. Ia faaeteete ma faautauta i mea e malaia ai.
2. Ia mataala i taimi uma.
3. Ia faalagolago i faasinoga a le Alii.

.....

MANATU AUTU O IULAI: “IA FAI MA TA’ITA’I LELEI”

So o se tagata ua filifilia e fai ma taitai i se faalapotopotoga, e tatau ona maua le potō e a’oa’o atu ai i tagata ua ia ta’ita’iina. Ia faasino ma faatonu i tagata i ala e manuia ai le galuega. Ia lava le onosai, faapalepale ma le alofa i tagata. Ia tutusa tagata i le vaai ma ia viia le Alii i lana taitaiga.

ASO SA: 5 IULAI 2020

MATAUPU: FAALOGO I LE A’OA’O MAI O MATUA

SINI: Ia malamalama le vasega, o le tamaitiiti e faalogo i le a’oa’o atu o matua, e manuia le olaga.

TUSI FAITAU: Faataoto 1: 8 – 9

FESOASOANI MO FAIAOGA:

Tamaiti o lo tatou faleaoga muamua lava e a’oa’oina ai tatou, i le amio, tautala, le vaai, faalogo ma le malamalama i mea lelei o le olaga, o o tatou aiga. O o tatou aiga i le mafutaga a matua ma a latou fanau, o iina le faavae malosi e amata a’oa’oina ai le fanau, ina ia sagatonu ala e savavali ai.

O le a’oa’oga foi lea mo i tatou le fanau, pei ona tatou faitau ai i le Tusi Paia. E tatau ona faalogo muamua i matua i mea uma ua la a’oa’o atu ai ma faatonu mai ai, auā o matua lelei uma, e a’oa’o fanau i mea lelei mo lo latou ola. O matua ua a’oa’oina lelei, ua ia i latou le potō mai le Alii, ma ua matata’u foi i le Alii i taimi uma. Lo latou potō lea e tatau ona faalogo i ai le fanau e manuia ai o latou olaga. O le potō foi lea ua faailoa atu e matua mo fanau, latou te malamalama ai foi, o le Atua le faavae o le iloa o mea lelei uma, pe afai e fa’aaloalo i le Atua i taimi uma.

Ia faatuatua i le Alii ia latou amio ma faatinoga lelei uma, ona latou maua lea o le potu.

Tamaiti, e leotele faatinoga i lo upu. Le faaupuga lea ia iloa lelei i o tatou aiga, i le va feagai ai o tatou le fanau ma matua. E a'oa'oina ai e i tatou le taua o o tatou matua ma isi o lou aiga faapea foi tatou lava, i le va fesootai ai. E le gata i lena, tatou te maitauina ai foi i faatinoga a matua i mea e tatau ona tatou fai, ma mea foi ua ave i ai le faamuamua i le aiga e manuia ai le fanau.

O le a'oa'oina e matua o le fanau i amioga lelei ma tonu i o latou olaga, o se faatinoga e fiafia i ai e tauave pea i taimi uma. E tatau i fanau ona fiafia i tapuaiga i aiga ma le Ekalesia, aemaise foi le faitauina o le Tusi Paia i aso uma. Le olaga lelei lea mo fanau mai faasinoga a matua, e faeaina ai foi latou i le lumanai, ma tauaveina pea o se taitaiga e manatua pea foi i so o se taimi.

GALUEGA FAATINO: Tusitusiga

Tusi mai sau fuaiupu i upu nei, aua e te toe aumaia le fuaiupu o i le tatou Tusi Faitau.

1. a'oa'o
2. laulaufaiva
3. pale
4. matagofie
5. asoa

PESE: Faalogo ma usitai, e leai se isi ala

A'OA'OGA:

1. Ia sili lau faatinoga i upu e tautala ai.
2. Taofi mau a'oa'oga a matua.
3. Faitau le Tusi Paia e potu ai.

ASO SA: 12 IULAI 2020

MATAUPU: UA FAASINO E LE ALII FILIPO I LE MEA E ALU I AI

SINI: Ia malamalama le vasega, sa fiafia lava ma usita'i Filipino e tala'i le Tala Lelei i nuu na tofia i ai.

TUSI FAITAU: Galuega 8: 26 – 35

FESOASOANI MO FAIAOGA:

I le taimi ina ua amata ona faasalalauina le Tala Lelei mai Ierusalema i Iutaia ma Samaria, sa toatele lava le au Kerisiano na ofo atu le ola, e fai ma auauna aua ua tuputupu pea le Ekalesia a le Alii.

O le tasi o tiakono na faaosofia lona fiafia i le talaiga, o le tagata lenei o Filipino. Ao i ai o ia i Samaria e tala'i ai Keriso, toatele tagata na liliuina ai ma talia le upu a le Alii, aua ua galue le Agaga o le Alii ia i latou. Na tupu tele foi le faatuatua o tagata ona o faamalologa na ia faia i tagata mama'i.

O se tasi aso, na faatonuina ai e le agelu a le Alii Filipino, ina ia alu atu i le itu i Toga (Sauté) i le ala mai Ierusalema i Kasa. Na tulai o ia ma alu ma ia mafuta ai ma le tagata Aitiope. O Aitiope o se atunuu e i Aferika oi Sauté o Aikupito. O lenei tagata Aitiope, o ia o le eunuka, o le auauna sili foi a le tupu tamaitai o Aitiope o Kanake. O ia foi na te tausia oloa uma a le tupu.

Na fetau i Filipino ma lenei eunuka, ao tietie mai o ia i lana taavale, ua foi mai Ierusalema na alu e tapuai ai. E tietie lava le eunuka ma faitau le Tusi Paia, i se vaega o le tusi a le perofeta o Isaia. Na valaauina Filipino e le Agaga ina ia alu atu o ia i le taavale e faatasi ma lea tagata. Na momoe Filipino i ai ma fesili ia te ia po ua ia lagona ma malamalama i le tusi o ia faitauina.

Peitai, e le malamalama lava le eunuka i tusi o faitauina. Na ia faapea atu foi ia Filipino – “Ou te mafaia faapefea, pe a le faasino

mai se tasi ia te a'u?" E faapea foi tatou le fanau, afai e te faitau i le Tusi Paia, ma e maua ai se upu ma se faaupuga e te le malamalama i ai, e tatau ona e fesili i isi tagata e fesoasoani mai ia te oe. O le nonofo ai la o Filipino ma lenei tagata, na ia faamalamalama atu ai ia te ia le uiga o le tusi a Isaia na ia faitauina. (Faitau faatasi tamaiti i le Isaia 53: 7 – 8) O lo o faatatauina lava lenei tusi ia Iesu Keriso.

Tamaiti, ai lava o le pogai lea na faasino ai e le Alii o Filipino e alu i le ala na Ia faasino e ui ai, ina ia faasalalauina pea ma a'oa'o tagata ia iloa le Tala Lelei o le Faaolataga na faia e le Alii.

Upu Faamalamalama:

1. eunuka o se alii ua faamamaina ma tuuina atu lona ola e auauna ai i se matai po o se tupu.

GALUEGA FAATINO: Faauma fuaiupu

O fuaiupu o i le vaega A, o lo o i ai o latou faaiuga sa'o i le vaega E. Saili le faaiuga sao ma toe tusi atoa le fuaiupu.

A

1. Na faatonu e le agelu Filipino
2. Na fetai ai Filipino ma eunuka
3. O lenei eunuka o le auauna sili
4. Na faalogo atu Filipino i le eunuka o lo o ia faitauina.
5. Na mana'o le eunuka i se tagata

E

- a) e faamalamalama le tusi na ia faitauina.
- e) o lo o ia faitauina se vaega o le tusi a Isaia
- i) e alu ifo mai Ierusalema i Kasa
- o) e sau mai Aitiope
- u) a Kanake o le tupu tamaitai o Aitiope

- Tali:- 1. (i) 2. (o) 3. (u) 4. (e) 5. (a)

PESE: Pese masani a Aoga Aso Sa
 "Ua ou filifili e mulimuli ia Iesu

A'OA'OGA:

1. Toaga e faitau le Tusi Paia
2. Talatalanoa ma lau uo ia Iesu
3. Ususita'i i faatonuga a matua.

.....

ASO SA: 19 IULAI 2020

MATAUPU: LEOLEO MAMOE LELEI

SINI: Ia malamalama le vasega, o Iesu le leoleo mamoe silisili.

TUSI FAITAU: Ioane 10: 11 – 15

FESOASOANI MO FAIAOGA:

Tamaiti, o le tatou Tusi Faitau mo le tatou mataupu, ua a'oa'o mai ai lo tatou Alii o Iesu, o Ia lava o le leoleo mamoe lelei. O le galulega a le tagata leoleo mamoe, e vaavaai i itu uma, e solo lelei ai le ola o le lafu.

E faamalolo ma fusifusi i mamoe mama'i, ma manunu'a. E ave mamoe i le vaomu'a ma tatai e faainu i le vai Afai foi e se ma leiloa se mamoe, o ia lava e alu e saili ma su'e mai ma toe aumai i le lafu. E le gata i lena, ae afai foi na te vaaia, se manu feai ua osofaia se mamoe, e tatau i le leoleo mamoe lelei ona taumafai e lavea'i mai lea mamoe.

Tamaiti, afai ua fetalai mai Iesu, o Ia o le leoleo mamoe lelei, e tatau lava ona tatou talitonu i ai, aua o tiute uma faaleoleo mamoe lelei na Ia faia. O lana galuega i le lalolagi, sa ia faamalolo i e na mama'i i ma'i eseese. Na ia fafaga tagata i upu lelei e ola ai, ma saili mai tagata agasala ua lē iloa le Alii, ona o le agasala. Na ia faaiu lava lana galuega faaleoleo mamoe lelei, i le tuuina atu o lona ola e lavea'iina ai mamoe ua tauau ina malo i ai le agasala.

O le eseeselea o le leoleo mamoe lelei, ma le tagata ua auauna ma faafaigaluega e se tagata e vaaia lana lafu mamoe. Afai e vaaia atu le auauna i le luko ua sau e 'aina mamoe, ona ia lafoa'i lea o mamoe ae sola, aua e le o ni ana manu. Pau a lona manao ia maua le totogi, ma maua lona ola saogalemu. Na te le maitauina foi mamoe i le lafu ma e le lalata foi mamoe ia te ia. Ua le faapena Iesu le leoleo mamoe sili. Na te silafia lelei tagata ua alolofa ia te Ia ma avea ma ona soo. O tagata ua talitonu ia Iesu i lona alofa, ua faatuatua ia te Ia, aua na ia tuuina atoa lona ola mo i tatou tagata agasala.

Tamaiti, o puapuaga ma le maliu na oo i lo tatou leoleo mamoe lelei o Iesu, ua ia ofoina mai ai le ola fou mo i tatou. O le ola e atoatoa ma manuia ai tatou. O le ola faavavau lea e amata atu a i le taimi nei, pe a tatou ola faapaiaina mo le Alii i taimi uma. O lo tatou ola ia Keriso, o lo tatou oo lea i se tulaga mauualuga, aua na taumasuasua le faamagaloga na faia e Iesu mo a tatou agasala ona o lona alofa.

GALUEGA FAATINO: Tusitusiga

Tusi mai sau parakalafa pe fa ni fuaiupu, e faamatala ai – “O Iesu le leoleo mamoe lelei” (silasila le faiaoga i galuega a tamaiti i ni faasaoga e tatau ona malamalama ai tamaiti)

PESE: A'oa'o le pese lea i tamaiti

1. Iesu le leoleo sili
Le leoleo mamoe e lelei
Na te ave o le lafu i le vao mu'a
Faafeinu i le vai e mama.
2. Lona ola ofoina mai
Ia tatou ola ai
Talitonu ia te Ia ma talia fiafia
O Iesu lo ta manuia

(fati i le pese – 'Iesu e alofa i tamaiti'
Jesus loves the little children

A'OA'OGA:

1. E leoleo le Alii ia i tatou uma.
2. Na maliu ma toetu Iesu ia tatou ola.
3. 'Aua le fefevale ma palaai, o Iesu e leoleo mai.

.....

ASO SA: 26 IULAI 2020

MATAUPU: 'AUA LE FAAMAUALUGA

SINI: Ia malamalama tamaiti, o le faamaualuga o se uiga lē lelei e inosia i fofoga o le Alii.

TUSI FAITAU: Luka 18: 9 – 14

FESOASOANI MO FAIAOGA:

Tamaiti, po o se amio lelei ea lea uiga o le faamaualuga? Ioe, o se uiga e le lelei. O a nisi upu e tutusa ma le faamaualuga? Lelei, o le fia sili, manatu maualalo i isi tagata; fia iloa ma le fia pule ma isi lava uiga e tele e faamatalaina ai le faamaualuga. O lona uiga la, e le tatau lava ona tatou faamaualuga.

O le tusi faitau o le tatou mataupu, ua a'oa'o atu ai Iesu i ona soo ma le motu o tagata, i le tala faa-faataoto. O le faataoto, o se tala faa-faatusa i mea e masani ai le olaga o tagata, o lo o i ai sona a'oa'oga faale-Agaga mo tagata e faalogologo i ai. O le auala lea ua fa'aaogaina e Iesu, e momoli atu ai lona finagalo paia, i amioga ma uiga tatau e ao ina ola ai le Kerisiano ua talitonu ia te Ia.

O le faataoto la ua fetalai atu ai le Alii, e faataata lea i tagata e toalua na o a'e i le malumalu e tatalo ai. O i la'ua ia o le faresaio ma le tagata ao lafoga. Na tulai muamua le faresaio ma fai lana tatalo. Ua ia faafetai i le Atua, ona ua le pei o ia o isi tagata, pei o fao mea, o e amio leaga, o e mulilulua, ma lona ao lafoga. Na ia faailoa atu foi i le Alii, e tailua i le vaiasosa ona anapogi ma e fai taulaga foi i le sefulua'i o ana mea e maua.

I le tatalo a le Faresaio, ua tatou iloa ai e pei e le'i alu i le malumalu e tatalo i le Atua. Na alu e faasalalau ma faailoa i tagata o i ai, lona lelei ma lona tulaga ese mai isi tagata. E foliga faamaualuga ana upu na tautala ai, i lona faatusaina o lona sili atu i lo le ao lafoga.

Peitai le ao lafoga, ua tu mamao atu, ua le tepa a'e foi i le lagi, a ua popo lona fatafata, o faailoga o le tagata agasala ua fia maua sona faamagaloga. Pau lava lana valaau – “Le Atua e, ia e alofa mai ia te a'u le tagata agasala.” O upu a le tagata ua tatalo ma le iloa lelei, o ia o le tagata agasala ua aioi atu i le alofa o le Alii e faamagaloina ai o ia. O le valaau ua faia ma le loto maualalo, i luma o le Atua.

Tamaiti, na talia e le Alii le tatalo a le ao lafoga. Na alu ifo o ia i lona fale, ua tauamiotonuina. Na lagona foi lona fiafia aua ua

alofa le Alii i lona loto ua faamaualaloina, e ala i ana upu ua tautino atu ai lona faatauvaa i luma o le Atua.

Tamaiti, o le faafiaamiotonu e le fiafia i ai le Alii. Na te taitaiina ai o tatou lagona i le fia iloa ma le faamaualuga. E le gata i lona, e vaai maualalo ai foi i isi tagata, ma saga le a'oa'oina ai foi se mea lelei mai le Alii. O le tatalo a le ao lafoga, o le tatalo foi lona e ao ina tatou faia, aua tatou te moomia le alofa o le Atua i so o se aso o le ola. ‘Aua e te faamaualuga i se taumafaiga ua e maua, nei vavaeeseina tatou mai fofoga o le Alii. Lagona pea le faatauvaa ma le faamaualalo i luma o le Atua.

Upu Faamalamalama:

- i) faataoto - o se tala faa-faatusa i faatinoga masani o le olaga, o i ai se a'oa'oga taua faa-le-Agaga mo le Kerisiano.
- ii) faresaio - o se vaega o le lotu Iutaia, e tausisi ma faatauvaa e i latou tulafono o le Feagaiga Tuai ma faiga masani o le latou tapuaiga.
- iii) ta'uamiotonuina- ta'u leleia ma amio sa'o i luma o le Atua.

GALUEGA FAATINO: Tusitusiga

Tusi mai sau tatalo puupuu pei o le tatalo a le ao lafoga.

(fautuaga – Afai e le lava le taimi, lelei foi ae valaau ni tamaiti e faaleo maia ni tatalo)

PESE: Pese masani (Fai sau tatalo i le taeao)

A’OA’OGA:

1. ‘Aua e te tatalo faaleaga isi tagata
2. Ia lagona le lotomaulalo ao tatalo
3. Toaga e tatalo i le Atua.

.....

MANATU TAIALA O AOKUSO:

E MANA’O LE ALII IA TATOU FESO’OTA’I MA IA.

O auala o feso’otaiga i le faatekonolosi o se faiga ua taua tele mo i tatou ma o tatou aiga, aua ua mafai ona tatou feso’otai ai. Peitai e sili atu ona taua tele i le soifuaga o le tagata faatuatua le feso’otai atu lea i lona Atua. O le finagalo foi lea o lo tatou Atua mo i tatou ina ia tatou feso’ota’i atu ia te Ia e ala i le tatalo e pei ona a’oa’o mai o lo tatou Alii o Iesu Keriso. E pei ona i ai le tatalo o lo o faamauina e nisi o le au fai-Evagelia. O le faapupulaina mai lea o lo tatou saili atu i le Atua e avatu le faafetai ona o lona alofa sasaa mai, o lana faamagaloga mo o tatou vaivaiga faale-tagata; aemaise o ana faamanuiaga e tele ina ia tatou manuia ai.

ASO SA: 2 AOKUSO 2020

MATAUPU: IA TATALO E LE AUNOA

SINI: Ia malamalama le vasega, o le ola tatalo i aso uma e maua ai le lototele ma le malosi sili mai le Atua; tatou te manumalo ai i faafitauli e tutupu i lo tatou ola.

TUSI FAITAU: Tanielu 6: 8 – 13.

FESOASOANI MO FAIAOGA:

O le tusi lenei a le perofeta o Tanielu, o loo faamauina i suesuega a nisi o le au suesue o le Tusi Paia, o le taimi a o i ai le malo i Saute po o le malo o Iuta i le tafeaga i Papelonia.

O Tanielu o le tasi lenei o perofeta ta’uta’ua i le tala faasolopito o le Tusi Paia ona o mea sa tutupu i lona vaitaimi. O Tanielu o le tagata ua i ai le potu i fa’aaliga po o le faamatala miti; a o le tagata foi sa tumau lona talitonuga ma mauaa lona faatuatua i le Atua. O le mataupu lenei e 14, o lo o faamatalaina ai le lotu leaga o alii sili o le malo o Papelonia ia Tanielu ona ua sili atu lona tulaga ia te i latou. E le gata i lea, a ua ave foi i ai le faamoemoega o le tupu aua le manuia o lona malo o Papelonia. O lea na latou taupulepule ai mo se auala faatogafiti e molia ai Tanielu i se tulafono i luma o le tupu ina ia fasiotia ai o ia. (6: 1 – 4.) O lea na latou poloa’iina ai loa le tupu, ina ia fai se tulafono ina ia aua nei toe faatoga se tagata i se isi atua, po o se tagata ae ia tau lava o le tupu e faatoga atu i ai. Ia faamauina foi e pei o tulafono a Metai ma Peresia lea tulafono, e le mafai ona talaina; ai se tasi na te soli lenei tulafono, ia lafoina i le lua o Leona. (f, 7,8) Na faataunuuna lava lea tulaga ma tusia ai e le tupu le tusi, peitai na faalogo ai loa Tanielu ona toatuli faatolu lea o ia ma tatalo ma faasaga i Ierusalem. A o lea foi e fai mai; o lana masani lea i aso uma. O lona uiga, e le’i faatoa tatalo ai lea o Tanielu, o aso uma lava e tatalo ai o ia. E le faatali Tanielu seia oo i taimi o puapuaga ma faigata na faatoa tatalo lea. O lana masani lea o le tatalo i le taeao, aoauli ma le afiafi. Na maua atu ai o ia e le au alii faufau leaga ia o le malo o loo faatoga atu i lona Atua. Na latou molia ai loa Tanielu i le tulafono e pei ona faamauina e le tupu o Papelonia. O lea lava na lafoina ai Tanielu i le lua o leona. Peita’i, lea lava na molimauina e le tupu le silisili ese o le Atua ina ua toe usu atu e siaki Tanielu o lo o ola pea.

Ioe tamaiti, sa le'i popole lava Tanielu i se mea e tasi auā na ia mautinoa lava e lavea'iina o ia e le Atua. Ua silafia foi e le Atua le moni o le saili atu o lana auauna o Tanielu ia te Ia. O le ala lea o le maua o le lototele o Tanielu ma manumalo ai i ona faafitauli; ona o lo o fa'aalia pea le silisili ese o le Atua e ala i lona alofa lavea'i mo le tagata e saili pea ma feso'otai atu ia te Ia e ala i le tatalo. O lona uiga, e le na o taimi e faia ai tapuaiga/lotu afiafi a aiga, po o lotu faitele a Ekalesia i Aso Sa taitasi, po o le taimi e 'ai ai, po o le taimi e moe ai ma le taimi e ala e tatalo ai. Ia tatalo i so o se taimi ma aso uma o lo tatou ola.

GALUEGA FAATINO:

Tusi mai sau tatalo i vaega e tolu e pei ona vaevaeina ai tatalo, ia le silia ma le lau pepa e tasi.

PESE: Faitau le Tusi Paia ma Tatalo i aso uma.

A'OA'OGA

1. Ia mafuta i le Atua i le tatalo i aso uma.
2. Tatalo ma le loto faamaoni i le Atua.
3. O le Atua lo tatou fesoasoani sili.

.....

ASO SA: 9 AOKUSO 2020

MATAUPU: O LE TAMĀ E TUTUMAU I LE ATUA (ASO SA TAMĀ)

SINI: Ia malamalama le vasega i le taua tele o le tumau i le Atua.

TUSI FAITAU: Iopu 2: 6 – 10.

FESOASOANI MO FAIAOGA:

Talofa tamaiti! O le a foi le Aso Sa lenei a tamaiti? Ioe, o le Aso Sa ua faapitoa mo tama, tatou te faamanatuina ai le taua o tama i totonu o tatou aiga, nuu ma le Ekalesia ona o le Tala Lelei. O le tatou mataupu i lenei taeao, o le taua o le tutumau i le Atua. O le tutumau i le Atua o le tasi lea o ala manuia o le tagata e pei ona i ai le tala ia Iopu. Ua tatou iloa foi ma silafia Iopu lea e fai mai o le tagata sa maua i le ma'i papala. Ae e tele foi nisi mea mata'utia na tutupu i le aiga o Iopu a'o le'i o'o ia te ia le ma'i papala. E pei ona faaumatia ai ana lafu manu, o ana auauna atoa ai ma lana fanau. Fai mai le tusitala o le tagata lenei o Iopu, o se tagata ua sao lana amio i le silafaga a le Atua. O lona uiga, o le tagata e suamalie ia te ia le feso'ota'i ma mafuta i le Atua i taimi uma, ma aso uma. O le mafuaaga lea o le manuia o lona soifuaga atoa ai ma lona aiga; sa tele foi ma faula'i lona tamaoaiga.

O le fesiligia e le Atua o Satani i le amataga o le mataupu lenei, po o fea na sau mai ai. O le tau faamanino mai lea o le fuafuaga a le Atua o le a sosoo ai mo lana auauna o Iopu. O se ata foi i le faapupulaina mai o le tauviga a le tagata e tumau i le Atua ma tofotofoga e oo i lona soifuaga ona o faafitauli e tutupu i le finau mai foi o Satani e faasese i le talitonuga ma le faatuatuaga ua ta mau ai le tagata i le Atua. O le vaega o le tusi sa faitauina, o lo o faamatala ai le pule a Satani mai le Atua ma na faaoo ai le ma'i papala ia Iopu, fai mai e gata a'e i ona alofivae, e gata ifo i lona tumua'i. A o lea foi e fai mai, ua avane e Iopu le ta'ega ipu omea ma valu a'i i lona papala. O le faailoga o le faanono manu o Iopu i le Atua ina ia alofagia ona mafatiaga. E fesoota'i lelei ma le nofo ai o ia i le efuefu, e faailoa ai lona salamō ma le loto maulalo aua ua ia talitonu; e lei tutupu fua mea ia te ia. O le taimi foi lea, ua leai se tasi e fia soso ia Iopu. O ana uo, o lona aiga; na oo lava i lona toalua ua fai atu ia Iopu; "ua e taofi mau pea ea i lau amiotonu? Ina faifai ia e oe o le Atua, ma e oti ai." O taumafaiga lava ia a Satani ua ui atu i le fafine ina ia faaseseina ai Iopu; ae peitai e le'i mafai. Aua fai mai Iopu, a

tatou talia ea na o mea lelei mai le Atua, ae tatou te le talia ea ma mea leaga. O le talitonuga o Iopu o mea leaga, o tofotofoga mai le Atua e saili mai ai i le tagata pe o mauaa ma tumau pea lona faatuatua faamaoni i le Atua. O lea lava na ia onosaia ai le mamafa o tiga ma faigata, ma lona talitonuga pau lea o le auala e faasaoina ai o ia. A fa'aaau le tala seia oo i le iuga, na toe manino ai le mata o le vai i mafatiaga o Iopu ma toe faafoi i ai e le Atua le tamaoaiga e tele.

Ioe, e i ai taimi e fa'aaogaina ai e le Atua faafitauli e tofotofoina ai i tatou ma lo tatou ola faatuatua ia te Ia, aua e eseese lava auala a le Atua e saili mai ai ia te i tatou. A tatou le mataala ma tatou tumau pea i le Atua, o le a faigofie ona osofaia i tatou e le fili ma tatou o ese ai ma le Atua ma tatou oo ai i le faafanoga.

GALUEGA FAATINO:

Tusi mai sau solo, 2 fuaiupu ae fa laina i le fuaiupu faatatau I le autu, "O le tama e tumau i le Atua."

PESE: A tumau ia Iesu, tatou te filemu.

A'OA'OGA:

1. E faaeaina i tatou pe a tatou tumau i le Atua.
2. E aveesea e le Atua o tatou tiga ma faigata pe a mauaa lo tatou faatuatua ia te Ia.
3. Tatou te loto tetele ma malolosi pe afai tatou te tutumau i le Atua.

.....

ASO SA: 16 AOKUSO 2020

MATAUPU: GALULUE FIAFIA

SINI: Ia malamalama le vasega i le taua o le galulue fiafia, aua e maopopo ai so o se mafutaga lava; aemaise o le finagalo foi o le Atua ina ia maua ai le fealofaniga.

TUSI FAITAU: Faataoto 31: 10 – 17; 24 – 28.

FESOASOANI MO FAIAOGA:

O le galulue fiafia, o se lagona e faaosofia ai tagata e galulue mo le leleiga o se faamoemoe o lo o taumafai iai. E una'ia tagata e fai se mea lelei mo le ta'uleleia o se aiga, o se nuu po o se Ekalesia. E faigofie ai foi galuega fai mo le atina'eina o so o se faalapotopotoga, aua e māmā se avega pe a pulupulu lima faatasi tagata uma ma le fiafia. E le gata i le faatupulaia o le tulaga i le tamaoaiga, ae tupu ai foi lagona faagaetia o tagata ona o le mafutaga e mafanafana i le mafuta faatasi. Ae a leai foi se fiafia i se mafutaga, e vave foi ona faamaamulu ma taaapepe, ma e le fia galulue foi tagata.

O le tusi o Faataoto o lo o i ai i totonu o tusitusiga a le potu i le faatulagaina o tusi o le Tusi Paia. O tusitusiga e faatatau i le gasologa o le soifuaga, ma le amio e tatau mo le ola o le tagata aemaise lava i totonu o le aiga, i le va o matua ma fanau faapea foi i le tane ma le ava. O le vaega o le mataupu sa o tatou faitauina, o lo o faamatala ai e Lemueli mai le valoaga a lona tinā na a'oa'oina ai o ia faatatau i le uiga o le ava amio lelei; po o le fafine mataala ma mataalia i le tausiga o lona aiga. O le tinā e galue ma le loto fiafia ina ia fua mai ana galuega lelei mo le manuia o lona aiga. O lea e pei ona fai mai ai le fuaiupu e 13, "Na te sailia fulufulu mamoe ma lino; ua galue ai ona lima ma le fiafia." Ioe, o le ala tonu lea e silisili ai lona tau nai lo penina. E silisili aua ua na o mea lelei lava na te faia, a o fua ia o lona loto

fiafia e tapena ai mea lelei mo ia ma lona aiga. E le o se tagata e faalogologo tiga pe fiu gofie, ae fetala'i lona mafaufau i mea e manuia ai lona aiga. O ona uiga ia lea e tupu ai lona malosi e pei ona fai mai, na te fusia lona sulugatiti i le malosi; na te faamalasia ona lava lima. (f 17) E tupu lona malosi ma tupu pea ona o lona loto ua fiafia i galuega a ona lima ma le manuia ua ia maua mai ai. O le mea foi lea e ofu ai o ia i le mamalu ma ataata i aso o lumanai, e le ai foi o ia i mea e 'ai a le paie aua ua lava taoso lona vaa mo aso uma ma lona aiga ina ua tautala o ia ma le potu; ua i lona laulaufaiva le tulafono o le alofa.

O le galue fiafia o lenei tinā e mafai ona a'oa'oina ai le toatele, e le gata i tagata taitoatasi; a o faalapotopotoga tetele e pei o aiga, nuu, Ekalesia ma so o se faapotopotoga lava i le taua o le galulue fiafia. O a faafitauli e tutupu mai ae le mafai ona faavaivaia ai i tatou e galulue pea auā se manuia o nei ma a taeao. E mafai foi ona lelei ma iu manuia galuega fai pe a fusia o tatou sulugatiti i le malosi ma faamalasia o tatou tagata e galulue ma le fiafia, e faaofuina ai i tatou e le Atua i le mamalu ma tatou le atuatuvaile ai i aso o i luma. Ia aunoa ma le faapaie a ia tatou tautalatala ma le potu ma ia tumau i tatou i le alofa e manuia ai a tatou galuega fai.

GALUEGA FAATINO: Taliga Fesili

1. O a mea e sailia e le ava amio lelei e galue ai ona lima faapei ona taua i le Tusi Faitau?
Tali: Na te sailia fulufulu mamoe ma lino.
2. I le fuaiupu e 14, o le a se mea o faatusaina ai lenei ava amio lelei?
Tali: O lo o faatusaina i le vaa o e faatauoa; e mamao le mea e au mai ai ana mea e 'ai.
3. O le a le taimi o le aso e amata ai galuega a le tinā lenei e pei ona taua i le fuaiupu e 15?
Tali: E amata ana galuega a o po lava.

4. Aisea e le mativa ai o ia i se mea e tasi?
Tali: E le mativa o ia i se mea e tasi ona e galue ma le fiafia.

PESE: Pese ma Viiga – 177.

A'OA'OGA:

1. E taunuu manuia galuega fai pe a tatou galulue fiafia.
2. Ia vaai mamao mo le lumanai ma a taeao.
3. Galue mo le viiga o le Atua ae le o tagata.

.....

ASO SA: 23 AOKUSO 2020

MATAUPU: ALU IA IESU AUA LE FEFE

SINI: Ia malamalama tamaiti, o lo tatou o ia Iesu, e le o se mea taufaafefe ia i tatou, aua o Iesu o la tatou uo moni ma o Ia tatou te maua ai le faaolataga.

TUSI FAITAU: Mataio 15: 21 – 28.

FESOASOANI MO FAIAOGA.

Ua olaola le Tala Lelei ia Iesu ma le faaolataga na ia saunia mo i tatou tagata agasala. O le faailoga o le malo o le Atua ua oo mai i le lalolagi. O lea foi ua masani tatou tamaiti i le faalupega masani o Iesu; o Iesu le uo a tamaiti, o Ia foi o le uo mo tagata uma. O le fesili la, aisea o le a tatou fefefe ai ia Iesu? O Ia lava na fetalai, ia tatou o atu uma ia te Ia, auā o Ia tatou te malolo ai. O le tusi a Mataio, o lo o faamauiina e le tele o le au suesue i le Tusi Paia, o le tusi mo le au Iutaia lava ia. O lo o tau faamanino ai le tupuaga ma le gafa o Iesu; e mai i le aiga o Iuta; lea o lo o fa'aaoga ai e Mataio le faaupuga, o le Alo o Tavita. O lo o tau

faapupula ai foi le Afio mai o Iesu, o le atoaga lea o tulafono na muai tuuina e le Atua ia Mose.

O le taimi foi lea o lo o tumau pea le mau a tagata Iutaia, o le faaolataga o le a aumaia e le Atua e mo i latou lava. O le mea lea na augani ai le au-so'o ia Iesu, ina ia tuuina atu o ia e alu, aua ua latou fefefe ina ua faatoa tuanai atu le finauga a Iesu ma Tusiupu ma le au Faresaio. Peitai, sa le'i mafai Iesu a ua tali atu o ia i le fafine Kanana, "e lei auina mai au i nisi, a e tau lava o mamoe o le aiga o Isaraelu ua le iloa." I le loto alofa tele o le tina i lana tama, na ia tali atu ai; "Le Alii e, ia e fesoasoani mai ia te au." Na toe fetalai Iesu e le aoga ona lafo o mea e 'ai a le fanau i uli. O le fetalaiga a Iesu e ogaoga, aua o lea ua faatusa le fafine i le uli po o le taifau se'i tulou. Ua foliga mai ai foi o lo o taumafai Iesu ina ia tulei ese le fafine Kanana. E lei afaina i le tinā lenei le fetalaiga faapaitau a le Alii mo ia, a ua naunau atu lava ma lona le fefe ina ia maua lava le faamalologa mo lana tama ua ulufia e temoni. Na ia faapea atu ai, "Le Alii e, e moni a oe; ae ui i lea ua aai uli o momoi mea ua pauu i laulau a o latou taula." O lea ua faailoa atu e le fafine, tusa lava po o ia o le tagata ese, o lea lava ua latou i ai faatasi ma tagata Isaraelu i lana faaolataga. A o se faailoga o le loto maulalo ma le loto tele o le tinā, ua faailoa atu lona faatuatua ua tele, ina ia mafai ona malolo ai lana tama. Na silafia e Iesu lea mea ona ia fetalai ai lea i lenei tina, ua te'a ese le temoni mai lana tama.

O Iesu, e le faailoga tagata, aua o ia o le Faaola mo tagata uma. E le'i sau mo nai tagata, ae na sau mo le lalolagi uma. Peitai mo le tagata lava ia; ia alu ma le loto atoa ma le faatuatua ua moni ia Iesu; ona maua ai lea o le faaolataga mo i tatou. Aua nei tatou fefefe pe palaai e faailoa atu ia Iesu faafitauli o taofiofi i o tatou loto, aua o Ia tatou te malolo ai.

Upu faamalamalama:

- i) momoi mea: fasi meaa
- ii) tāula: matai, alii
- iii) uli: taifau, maile.

GALUEGA FAATINO:

Faatumu avanoa nei i upu o lo o taua i lalo.

tāula, faatuatua, mana'o, moni, uli, momoi, aai, Funa, pauu.

Ona fai mai ai lea o ia, "Le Alii e, e a oe; ae ui i lea ua e o mea ua i laulau a o latou Ona tali atu ai lea o Iesu, "..... e, ua tele lou; e pei o lou ia faapea lava ona faia ia te oe." Ona malolo ai lea o lana tama teine i lea lava itu aso.

PESE: Jesus is the answer to your every need (O Iesu o le tali I soo sou manaoga..)

A'OA'OGA:

1. Ave ou mafatiaga ia Iesu e te mapu ma malolo ai.
2. O Iesu le Faaola mo tagata uma.
3. Ia moni lo tatou faatuatua tatou te o ai ia Iesu le Faaola.

.....

ASO SA: 30 AOKUSO 2020

MATAUPU: E FAATONU E LE ALII I TATOU I LE MEA TATAU

SINI: Ia malamalama le vasega, e manuia so o se mea tatou te fai, pe a usita'i i le upu a le Alii.

TUSI FAITAU: Mataio 2: 13 - 15

FESOASOANI MO FAIAOGA:

Tamaiti, o a ni feau e masani ona faatonuina ai oe e ou matua e fai? Lelei tele. Sa e usitai la e fai ia faatonuga pe leai? O le mea moni lava tamaiti, o faasinoga uma ma faatonuga e fai e o tatou matua ia i tatou, e tataua lava ona tatou fiafia e faataunuu, aua e le gata ina e lelei ma manuia ai, ae ia manatua foi e outou, e leai se matua na te faatonu sana fanau i ni faasinoga lē lelei.

O le tatou Tusi Faitau, ua faamatalaina ai le solaaga a Iosefa ma Maria ma le tama o Iesu i le nuu o Aikupito. O le faatonuga lea mo i latou mai le Alii, e pei ona faailoa atu e le agelu a le Alii ia Iosefa i le miti. O le feau e tataua lava ona usitaia, aua ua saili Herota le tupu o Iutaia, e fasioti ia Iesu. Ua faia e Herota lenei fuafuaga leaga, aua ua faalogo i tagata, ua saili le mea tonu o fanau ai le tupu o tagata Iutaia, le Keriso. Ua manatu ai o ia, e sili ona fasiotia lenei tupu fou, nei oo mai ma suia o ia i le nofoalii o le tupu.

Na iloa e Iosefa lenei fa'aaliga na sau ma le agelu a le Alii, ona le toe faatali lea, ae ua latou tapenapena i le malaga. Ua tulai Iosefa ma Maria lona tinā i le po ma o atu loa ma Iesu i le malaga agai atu i Aikupito. Sa nonofo ai lava i latou i Aikupito pe tasi i le lua tausaga. Ae ina ua oti Herota sau le tupu, ona toe faafoi mai lea o le tama o Iesu ma ona matua i Isaraelu, e le Alii, faapei o afioga a le Alii na faailoa atu e le perofeta o Hosea ia Isaraelu i le Feagaiga Tuai (Hosea 11: 11)

Tamaiti, e le'i o ese Iosefa o Maria ma Iesu mai lo latou aiga ae malaga atu i Aikupito, ona ua fefefe pe palaaai foi. Na o ese ona o le usitai i le upu a le Atua, aua o le upu a le Atua, o le siufofoga e faaolaina ai le tagata ua tumau ia te Ia.

GALUEGA FAATINO: Tali Fesili

1. O ai na faailoa ia Iosefa le feau mai le Alii?
2. O le a le taimi na iloa ai e Iosefa lenei fa'aaliga mai le Alii?
3. O fea na sosola i ai le aiga?

4. O le a le taimi o le aso na alu ai le malaga?
5. Pe na toe foi mai lenei aiga i lo latou nuu moni?

PESE: Faalogo ma usita'i e leai se isi ala

A'OA'OGA:

1. Faalogo lelei i matua
2. Tulai fiafia e fai feau a matua
3. Faamalosi ia maua le tau.

.....

MANATU AUTU SETEMA & OKETOPA: IA AMIO SA'O MA AMIOTONU

O le amio sa'o ma le amiotonu, o le finagalo lea o lo tatou Alii mo lo tatou ola, e iloa ai ua tatou talitonu ma faatuatua ia Iesu Keriso. O lo tatou talia o Iesu le faaola i o tatou loto, o le faailoga lea ua tatou mulimuli moni ia te Ia, ma avea i tatou ma tagata o lona aiga paia, le Ekalesia.

ASO SA: **6 SETEMA 2020
(ASO SA O LE TALA LELEI)**

MATAUPU: **O LE TALA LELEI**

SINI: Ia malamalama le vasega, o le Tala Lelei, o le tala o le faaolataga mo tagata uma ua faatuatua i le maliu ma le Toetu o Keriso.

TUSI FAITAU: Roma 1: 1 – 6

FESOASOANI MO FAIAOGA:

Tamaiti, o manatua e outou le sauniga lea e faamanatuina e le tatou Ekalesia, i le Aso Sa lenei? Lelei tele. O le Aso Sa lenei e faamanatuina pea e le tatou Ekalesia i tausaga taitasi, o le Aso Sa o le Tala Lelei. E faamanatu ai ia i tatou le oo mai o le Tala Lelei i Samoa. O le Tala Lelei, o le tala i le alofa tunoa o le Atua i le lalolagi agasala. O le alofa na fa'aalia e le Atua ia Iesu Keriso lona Alo pele, i lona maliu ma lona toetu manumalo ina ia magalo a tatou agasala.

E ui lava e lei oo Paulo i Roma e mafuta ma le Ekalesia i Roma, ae ua ia faailoa atu ma lona agaga maualalo lava i tagata, o ia lava o le auauna a Iesu Keriso. Na valaauina foi o ia e le Alii e fai ma ana Aposetolo e talai lana Tala Lelei. O lona faamoemoe foi, e i ai lava le taimi e aumai e le Alii a mafuta ai ma i latou.

I le tatou Tusi Faitau, ua ootoo atu ai e Paulo le Tala Lelei, e uiga ia Iesu Keriso le Alo o le Atua.

- i) Na afio mai o se tagata i le natura masani o le ola o le tagata.
- ii) O Ia o se vaega o le aiga tupu faa-Iutaia o Tavita
- iii) O Ia na maliu ae na toetu mai le oti
- iv) O Ia ua na tatala le faitotoa mo le alofa tunoa o le Atua ma lona agalelei, ina ia sasaa mai i o tatou luga.

Le alofa tunoa lea o le Atua ua ta'u atu e Paulo i Kerisiano o Roma, lea ua latou maua foi ao galulue ai o Aposetolo, e talai atu le Tala Lelei ia Keriso. O lona manao sili lava, ia talia e tagata uma ma faatuatua i le suafa paia o Iesu Keriso. O Ia foi o le Tala Lelei, aua na Ia faataunuu le finagalo o le Atua, e ala i lona maliu ma lona Toetu. Ua maua ai lo tatou faaolaina mai le agasala, pe a tatou salamo mai le leaga o le agasala, a ia faatuatua i le Suafa o Iesu Keriso.

Upu Faamalamalama:

- i) aposetolo - 'o le ua auina atu', o le tagata ua tofia e le Alii, e alu atu e talai le Tala Lelei.
- ii) faasinotonuina - faailoa mai
- iii) anaana - usiusita'i
- iv) alofa tunoa - (grace) o le alofa e aumai na o le Atua i le tagata agasala ua salamo ma talitonu ia te Ia.

GALUEGA FAATINO: Tusiga Solo

Tusi mai sau solo faatatau i le sauniga ua faamanatuina e le tatou Ekalesia i lenei Aso Sa.

O LE TALA LELEI - Tau o le 2 fuaiupu, e 4 laina i le fuaiupu e tasi.

(Silasila i ai le faiaoga ma faasa'osa'o galuega a tamaiti)

PESE: Tapena ma saunia e le faiaoga se pese o le tatou Tusi Pese (Pese ma Viiga) o le Tala Lelei.

A'OA'OGA:

1. O Iesu le Tala Lelei.
2. E manao le Alii e tala'i atu le Tala Lelei
3. O le Tala Lelei, o le tala sili lea.

.....

ASO SA: 13 SETEMA 2020

MATAUPU: UA FAALAGOLAGO TAVITA I LE SUAFA O LONA ATUA

SINI: Ia malamalama le vasega, e tatau ona tatou faatuatua i le Atua i taimi uma o le ola, tatou te manumalo ai.

TUSI FAITAU: 1 Samuelu 17: 38 – 50 (mo le Faiaoga)
1 Samuelu 17: 45 – 47 (mo le Vasega)

FESOASOANI MO FAIAOGA:

Tamaiti, o le tatou mataupu o lenei Aso Sa, ua faamatalaina ai le faatoilaloina e Tavita le atalii o Iese, o le toa matautia ma le tino ese o le malo o Filisitia e igoa ia Koliata.

Ua sauni Tavita e ofo atu o ia e tau ma lena Filisitia, ona faaofu ai lea o ia e Saulo le tupu i ona ofu. Ua tuuina atu foi le pulou apa memea i lona ulu, faaofu ia te ia i le ufi fatafata uamea. Ua fusi atu foi lana pelu i luga o ona ofu, ona faataitai lea e Tavita auā e lei masani ai o ia.

Tamaiti o nei teuga uma o auupega na faia e Saulo mo Tavita, e lei taliaina e Tavita, auā e lei masani ai o ia. Ua tuu ese uma a ua alu atu ma lona to'oto'o i le alia ma filifili i maa lamolemole e lima ua fafao i lana taga. Ua ia ave foi lana ma'ata ma faalatalata atu ai lea o ia i le Filisitia mata'utia o Koliata. Ua vaai mai le Filisitia ia Tavita, ona inoino ai lea ia te ia, aua o le tama itiiti o ia. Na valaau atu foi Koliata ia Tavita, "Ou te se uli ea a'u, ina ua e sau ia te au ma to'oto'o?" Na fetuu atu foi e Koliata le Atua o Tavita. Tamaiti ua faamualuga lava le toa Filisitia lenei, ona o le vaai atu i le tino laitiiti o Tavita. Ua ta'u atu foi e Koliata ia Tavita, o le ana tuuina atu lona tino i manu felelei ma manu tata'a.

Tamaiti, e lei fefe ai Tavita i ia mau folafolaga a Koliata. Ua ia valaau atu i le Filisitia, "Ua e sau ia te a'u ma le pelu, ma le tao

ma le tao leoleo; a o a'u, ou te alu atu ia te oe i le suafa o le Alii o au, o le Atua o le itu taua a Isaraelu ua e faifai i ai. O le aso nei e tuuina mai ai oe le Alii i lo'u lima, ou te fasi ia te oe ma ave ese lou uluE iloa ai foi e lenei faapotopotoga uma, e le faaolaina tagata e le Alii i se pelu ma se tao, auā o lo o i le Alii le taua, na te tuuina mai outou i o matou lima."

Tamaiti e moni lava upu na folafola atu e Tavita i le toa Filisitia ma lo latou nuu uma. Ua tago Tavita i lana ato ma avae se ma'a, ua sasau e ia le ma'ata, ua lavea ai le Filisitia i lona muaulu. Ua goto le maa i lona muaulu ona pa'u fa'o ai lea i le eleele. Ua manumalo Tavita auā sa faalagolago tasi i lona Atua Soifua. O le Suafa o lona Atua na faatuatua i ai, o Ia lava e tali mai i lona mana'o. Tamaiti, ia faapea foi tatou, a tatou feagai ma faigata i mea e tutupu o lo tatou ola, valaau i le Suafa o lo tatou Alii. O Ia lava e faafofoga mai i lo tatou vaivai. E faapena foi i le aoga. Ia tatalo ma faatoga atu i le Alii e tauto'alua tatou i mataupu. E le na ona valaau i le Alii, ae ia tatalo ma toaaga i le aoga ma meaaoga.

GALUEGA FAATINO: Taliga Fesili

1. Aisea na le fa'aogaina ai e Tavita le pulou apa memea, le ufi fatafata uamea ma le pelu i le fetauiga ma Koriata?
Tali: Auā e le masani ai
2. E fia ma'a na filifili e Tavita mai le alia?
Tali: E 5
3. O le a se lagona o le toa Filisitia, ina ua ia vaavaai atu ia Tavita?
Tali: O le inoino.
4. O ai na fetuu e le toa Filisitia?
Tali: O le Atua o Tavita.

5. O le a na faalagolago i ai Tavita ina ua sauni le taua ma le toa Filisitia?

Tali: O le Suafa o lona Alii.

6. O fea tonu o le tino o Koliata na lavea i le ma'a a Tavita?

Tali: O le muaulu.

PESE: Saunia e le faiaoga se pese mo le mataupu.

A'OA'OGA:

1. Faalagolago ia Iesu e manuia ai.
2. 'Aua le faamualuga i isi.
3. Faatuatua i le Suafa o le Atua Soifua.

.....

ASO SA: 20 SETEMA 2020

MATAUPU: 'AUA LE OLA FAALATA

SINI: Ia malamalama le vasega, o le ola faalata o le agasala lea i luma o le Atua.

TUSI FAITAU: Mataio 26: 20 – 25

FESOASOANI MO FAIAOGA:

Tamaiti, o le upu faalata ua faamamafaina ma fia faatauaina i le tatou mataupu o lenei Aso Sa, ua faasino lea i se uiga lē lelei ma inosia i luma o le Atua. O le uiga o le upu faalata, o le ola tauoleole po o le ola faafoliga e tupu ifo i le loto o le tagata, e faaleaga ai le isi tagata, ina ia pa'u atu i puapuaga. E mafai foi ona faapea – o le tuuina atu o le tagata i e o ita mai ia te ia, e aunoa ma se manatu mamafa i ai.

Tamaiti, o se amioga e matua leaga lava, auā ua leai ma se alofa o i ai, aemaise le aafia ai fua o le ola o le isi tagata i faufauga leaga ua fai ia te ia. O le tusi sa tatou faitauina, ua manino ai i le tatou faitau, le faalataina o Iesu e Iuta, o se tasi o ona so'o e sefululua. A o faatasia Iesu ma ona soo i le latou taumafataga mulimuli, i le afeafe aupito i luga i le fale o le tasi aiga, na fetalai atu ai le Alii ia i latou. *“E moni, ou te fai atu ia te outou, e faalataina a'u e so outou.”*

Na matuā tiga o latou loto i le mea na saunoa i ai Iesu. Ua latou taitasi foi ma fesili atu ia te Ia – *“Le Alii e, o a'u ea?”* Silafia lelei lava e Iesu, o lo o i ai pea i ona so'o le tagata tauoleole ma taumafai e tuuina atu o Ia i e o fai o Ia mo latou fili, ina ia fasiotia. Ui lava ina latou tau fesilisili ma saili po o ai ua faalataina lo latou matai, ae na faa-ata atu e Iesu – *“O le fufui faatasi lona lima ma lo'u i le tanoa, o ia lea na te faalataina a'u ...”* i le taimi o Iesu, o le tele lava o meaai i se taumafataga e aai uma ai tagata mai totonu o se ipu e tasi. Ma e i ai le taimi e fufui faatasi ai ni lima se lua i le ipu e tasi. O lo o taua e Ioane 13: 26, na fufui e Iesu le mea e ai ma avatu ia Iuta le Sekara, le atalii o Simona. Na fetalai atu Iesu, *“... E lelei i lea tagata pe ana le fanau mai o ia.”* O se fetalaiga tatou te iloa ai, e inosia tele i luma o le Atua lenei amio o le ola tau faalata.

E a'oa'o mai ia i tatou le fanau, o le ola faalata, o se agasala e le taliaina e le Alii ona ola ai tatou. Aua e te taumafai e tuuina atu lau uo ia inosia ma saunoa i ai nisi tagata. Faailoa lou alofa i isi tagata, ae lē o lē faaleaga ma faifai tala i ai.

GALUEGA FAATINO: Faatumu avanoa

Faatumu avanoa o i fuaiupu i lalo, i upu ua tuuina atu:- Rapi, fanau, faalataina, Atalii, afaifi

1. Na _____ Iesu e se tasi o ona so'o.
2. Na faia le talisuga mulimuli a Iesu ma ona so'o i le _____.
3. O Iesu o le _____ o le tagata.

4. Sa sili i le so’o na faalataina Iesu ona lē _____ mai o ia.
5. Ua fesili atu Iuta ia Iesu, “ _____ e, o a’u ea?”

TAULOTO: A’oa’o le tauloto lea i tamaiti.

E leaga le ola faalata

1. O le ola faalata e inosia i le Alii
O se a’oa’oga foi lea mo tatou tamaiti
Le mafutaga a Iesu ma ona so’o sa mafanafana
Iloa mulimuli ane, o lo o i ai Iuta le faalata.
2. Talofa i le Alii ma ana a’oa’oga alofa
Iuta le Sekara, leai ma sau mea na maua
Sa sili ai ona e le fanau mai
Aua ua tiga ai le finagalo o le Matai.
3. Tamaiti ia taumamao ma lenei uiga mataga
Aua e te toe feagai lava ma puapuaga
Manatua Iesu na Ia faamagalalo tatou
Ina ia tatou maua le ola fou.

A’OA’OGA:

1. Alofa i lou uso/tuafafine/au uō.
2. Faamagalalo atu i lē ua ita mai ia oe.
3. E faamagaloina tatou e Iesu i amioga leaga.

.....

ASO SA: 27 SETEMA 2020

MATAUPU: E A’OA’OINA TATOU MAI MEA FAIGATA

SINI: Ia malamalama le vasega, o le ola i mea faigata o le olaga, e luitauina ai le tagata ma na maua ai foi se taunuuga lelei o lona ola.

TUSI FAITAU: Iona 2: 1 – 10

FESOASOANI MO FAIAOGA:

Tamaiti, e ese le taua o le tatou mataupu o lenei Aso Sa – ‘*E A’OA’OINA TATOU MAI MEA FAIGATA.*’ O lona taua, auā tatou te lē maua se mea lelei, pe a tatou lē tigaina. E tupu lou iloa fai feau i le aiga, pe a e tigaina i feau ma auauna lelei i ou matua. E te lē nofonofo foi ma paie i le aoga e lē faia ni meaaoga, ona maua lea o le poto. E tataua ona suesue i meaaoga ma tauivi i faigata o le ola a’oa’oina, ona suamalie lea ia te oe o le poto. E tele isi vaega o lo tatou olaga, e fetauti lelei ma le tatou mataupu.

O Iona le atalii o Amitai, o le perofeta a le Atua. O lo o ta’ua i le mataupu muamua o le Tusi a Iona, na valaauina Iona e le Atua e alu e tala’i lona finagalo ma alaga se salamo i tagata o le aai o Nineva, mai a latou agasala. Peitai na lafoai e le perofeta le upu a le Atua, ae ua sola i le vaa i le isi nuu o Tasesa le igoa. Na sousou le vasa, ona lafo ai lea o Iona e le au vaa i le sami, auā na iloa e tagata, ua sola o ia ai luma o le Alii. O iina na saunia ai loa e le Atua le i’a tele ma foloina ai loa Iona.

I le tatou mataupu la o lenei Aso Sa, ua tatou malamalama ai i puapuaga na oo ia Iona, a o i ai o ia i le manava o le i’a. Sa matuā fememea’i le perofeta, auā ua na iloa ua siomia o ia e faigata. O lona i ai i le moana i totonu o le sami, o lona tuugamau lea auā ua siomia o ia e galu ma peau. Na ia manatu

lava, ua lafoa'iina ma faagalo e le Atua o ia, ma ua fai ma ma afuaga o le vaivai ai o Iona loto i totonu ia te ia. O ona mafatiaga uma nei na tutupu ifo, ao i ai i le manava o le i'a. Ma ua manatu ai lava, o ia lava le pogai o le tutupu o mea tiga ua la feagai.

Peitai, o totonu lava o lea nofoaga pogisa, na alaga mai ai Iona i Iona Atua mo se lavea'i. sa tatalo o ia mai totonu o le i'a, ma na faafogaina e le Alii. Tamaiti, o le tatalo, e mafai lava ona e tatalo i le Atua i so o se mea, i so o se taimi foi e te moomia ai lana fesoasoani mo tatou. E le faapea foi, seiloga e maua le tagata i puapuaga, ona faatoa tatalo lea i le Alii, pei o Iona. E tatau ona tatou mafuta ma lo tatou Atua i so o se taimi (taimi e solo lelei ai le ola ma taimi e siomia ai tatou e puapuaga.) O le alofa tunoa o le Atua e tele pea lea mo le tagata ua feagai ma luitau ogaoga, pe a tatalo atu ma le faatuatua.

O le olataga na faia e le Atua mo Iona, o se a'oa'oga foi lea mo le perofeta i le fia fa'aaogaina o ia i le galuega talai a le Alii. O le valaauina o ia e fai ma perofeta, o lana matafaioi lea na tofia ai, ina ia faailoa atu i tagata le finagalo o le Atua, ae lē o le sola ese e lē fia talia ma usita'i i le Atua. Ui i lea, o le tala ia Iona, na toe fiafia lava o ia e alu e faataunuu le valaauina muamua.

E a'oa'oina ai tatou tamaiti, tatou te maua le fiafia ma faamanuiaga mai le Atua, ina ua tatou finau, onosai ma tauivi i mea faigata o le olaga. O le ala lea tatou te maua ai mea lelei mai le Atua, aua e silafia e Ia o tatou ala uma.

GALUEGA FAATINO: Tali i Fesili

Tali fesili nei mai le tatou mataupu.

1. O fea le nofoaga na tatalo ai Iona i le Atua?
Tali: O le manava o le i'a.
2. Aisea na valaau ai Iona i le Atua?
Tali: Auā ua puapuagatia o ia.

3. O le a le manatu o Iona ina ua feagai ma puapuaga?
Tali: Ua lafoa'iina o ia e le Atua.
4. O le a le mea e tupu i le tagata e usita'i i mea faatauvaa ma fiafia i le pepelo?
Tali: E lafoa'iina o ia ma lē maua manuia mai le Atua.
5. Aisea ua toe faia ai e le Atua le olataga mo Iona?
Tali: Aua ua Ia faafogaina lana tatalo.

PESE: Iona i le manava o le i'a.

Iona x 5
I le manava o le i'a

A'OA'OGA:

1. Tatalo i le Alii i so o se taimi
2. E manuia lou olaga pe a e ola i mea faigata
3. 'Aua e te alu ese mai a'oa'oga a matua.

.....

OKETOPA:

- 4/10/2020 – Tapenaga o le Lotu Tamaiti.
- 11/10/2020 – Aso Sa Lotu Tamaiti.
- 18/10/2020 – Malologa Lotu Tamaiti.

ASO SA: 25 OKETOPA 2020

MATAUPU: IA LOTO MAMĀ

SINI: Ia malamalama le vasega i le uiga loloto o le loto mama, aua e tatau mo i tatou ina ia mafai ona fai ai mo i tatou le malo o le Atua.

TUSI FAITAU: Luka 18: 15 – 17.

FESOASOANI MO FAIAOGA

Talofa tamaiti, o a mai outou i leni taeao, talitonu o loo manuia uma i tatou i le alofa ma le agalelei o lo tatou Atua. O le tatou mataupu i leni taeao, *IA LOTO MAMĀ*. O le tasi leni o amio e tatau mo le ola faatuatua o le tagata e faigata lava ona iloa e o tatou mata po o la tatou vaai foi. Peitai o se faamatalaga lata mai, o le loto lelei ma le loto fai mea lelei.

O le vaega leni o le tusi a Luka o lo o a’oa’o ai Iesu mo e ulufale i le malo o le lagi. Na fetalai Iesu i le amataga o le mataupu leni i le faataoto e uiga i le faamasino amioletonu. O loo sosoo mai ai ma le eseese o tatalo a le faresaio ma le tagata ao lafoga. O loo faaata atu ai e Iesu le eseese o le faamasinoga a le tagata ma le Atua. O le Atua e tuu avanoa mo le tagata ina ia salamo e pei ona tatalo ai le ao lafoga. O lona uiga, e tatau ona salamo le tagata ina ia faamamaina ai o ia. O le fesootaiga lea ma le vaega o le mataupu sa tatou faitauina. Ua faatusa ai e Iesu o ē sao atu i le malo o le Atua i tamaiti. E le faapea ia toe avea le tagata matua ma se tamaitiiti, pe toe amio faa-tamaitiiti. E leai, aua e le o le aano moni lea o le fetalai a Iesu, aua o le tamaitiiti lava ia, i lona tuputupu a’e, e lei malamalama lona mafaufau i le eseese o le mea sese ma le mea sa’o. E faalagolago i le a’oa’o atu a ona matua e faapupulaina ia te ia le amio e tatau ona ola ai. O lona uiga, o mea e faia e le tamaitiiti; e faia lava ma lona loto mamā. O le

mafuaaga foi lea o le fetalai a Iesu i le fuaiupu e 17, “Ai se le talia le malo o le Atua e pei o se tamaitiiti, e le sao lava ia i ai.” O lo o fetalai Iesu i lona taimi, auā o Ia lea o le malo o le Atua ua afio mai i le lalolagi. Peitai o le mea o lo o tupu, ua leai se loto mama i tagata e talia ai o Ia; o le malo o le Atua. O lona uiga, afai e maua e tagata le loto mamā ma talia Iesu, ua talia foi e tagata le malo o le Atua. Afai foi e teena e tagata Iesu ona o le loto leaga ma le loto palapala, ua teena foi e i latou le malo o le Atua.

GALUEGA FAATINO: Tali mai i le Sa’o po o le Sese.

1. Na o ane tamaiti ia Iesu latou te taalo.
Tali: sese
2. Na valaau le au soo i tamaiti e omai ia Iesu
Tali: sese
3. Ua faatusa e Iesu e o i le malo o le Atua i tamaiti.
Tali: sa’o
4. Na fetalai Iesu, ai se talia le malo o le Atua e pei o se tamaitiiti, e le sao lava ia i ai.
Tali: sese.

PESE: O outou e fia sao..... (Pese ma Viiga – 122)

A’OA’OGA:

1. Ia tatou loto mama aua o le ala lea tatou te sao ai i le malo o le Atua.
2. Ia tatou talia Iesu ma le loto atoa.
3. E fia silasila le Atua i le tagata loto mamā.

.....

MANATU TAIALA O NOVEMA: IA SUI MA OLA AI.

O se manatu taiala mo le masina, e le mafai ona o faatasi ma le soifuaga o tagata taitoatasi. Aua o le tele o nisi ua na o upu e gagana ai i le suia o le tagata e pei ona aoao mai afioga a le Atua, ae lē mafai ona ola ai. A o le atoaga lea o le soifuaga faa-Kerisiano, e le gata i le gagana i a’oa’oga mai afioga a le Atua; a ia tausi ma ola ai foi.

ASO SA: 1 NOVEMA 2020

MATAUPU: SALAMŌ I AU AGASALA

SINI: Ia mae’a le mataupu ua malamalama le vasega i le taua o le salamō ma liliu i le Atua e maua ai le faaolataga mo tatou agaga.

TUSI FAITAU: Esekielu 14: 1 – 6.

FESOASOANI MO FAIAOGA :

O le upu agasala, e lua ni upu o loo fausiaina ai; o le upu *AGA* – amio, ma le *SALA* – sese. O lona uiga, o se amio ua sese e tatau ai ona oo i le tulaga o le faasala. O le mafuaaga lea na faatino ai le *IFOGA* i le aganuu faa-samoa, e pei ona i ai le pulou i le ietoga; o lo o atagia ai le uiga o le salamo ina ua lagonaina le loto maulalo e faailoa ai le taumafaiga e fai se leleiga ma le ua afaina i se amio ua sese ma oia ai le filemu i le va feagai ai o tagata. O le taua lea o le lagonaina o le loto salamō, e faailoa ai le faanoanoa loloto ina ua agasala ma liliu ese mai ai ae faia le finagalo o le Atua.

O Esekielu, o lo o i ai le talitonuga o lana galuega faa-Perofeta, o le taimi lea o lo o i ai le malo o Iuta i le tafeaga i Papelonia; ma o le tasi lenei feau taua na ia taulogologoina i tagata o le nuu o le Atua. Ia latou salamō ma faafouina o latou tagata ina ia

maua ai se faaolataga mai le Atua ma ea ai lo latou pologa i nuu ese. O lo latou o ese mai le Atua ma le olaga na ia finagalo i ai, o le taui lea o le faatafea i nuu ese ina ia aoaina ai i latou. Peita’i o le i ai o le nuu i Papelonia, ua tosina ai o latou loto tu ma aga faapaupau aemaise ai le avaga o latou loto i tupua o lo o tapuai ai ia tagata ae galo ai le Atua. O le mataupu la lenei e 14, o lo o talanoa ai le perofeta e uiga i le saili pepelo o le nuu i le Atua ma le feau ia latou salamō ma liliu ese mai i a latou tupua. O le afioga a le Atua ua oo ifo i le Perofeta o Esekielu, o ia lava na te tali atu i tagata o Isaraelu auā ua ia silafia o latou loto faaoleole ia te Ia ona o a latou tupua. O le taumafai lava lea o le Atua e ta’u atu ia Isaraelu lo latou agasala matuia lea auā ua latou tia i le feagaiga na fai i le amataga. E fai i latou ma nuu o le Atua ae fai le Atua ma o latou Atua. Ua latou soli lea feagaiga atoa ai ma le tulafono muamua ma le lua (Esoto 20: 3-6). Peitai, i le fuaiupu e 6, o lo o fetalai ai le Atua ia Esekielu e fai atu i le nuu, ia liliu ese i a latou tupua ae ia liliu atu ia te Ia e maua ai lo latou faaolataga. O lona uiga ia salamo le nuu mai i ā latou agasala aua ua latou ola i se olaga inosia ma le mataga e le fia silasila mai ai le Atua. A le salamō le nuu o lona uiga o le a tupu pea le toasa o le Atua ia te i latou. O le avanoa ua tuuina e le Atua i lona nuu e lagona i o latou loto le loto maulalo ma latou iloa ai ua latou agasala ma faia se galuega ina ia toe faaleleia ai lo latou va ma le Atua. Ua na o le pau lea o le auala e toe foi mai ai ia te i latou faamanuiaga e tele mai le Atua aemaise o lo latou fiafia i se saolotoga e maua mai ai ma faafoisia i o latou eleele ma lo latou faasinomaga.

E faapea foi i tatou uma tamaiti, ia tatou lagona le salamō faamaoni i luma o le Atua ona o a tatou sese ma agasala e faia ina ia tatou maua ai le faamagaloga sili mai ia te Ia. Tatou te maua ai le saolotoga moni ma fiafia mai ai le Atua ia te i tatou.

GALUEGA FAATINO: Taliga Fesili.

Tali mai Fesili nei

1. Faamatala mai le uiga o le salamo.
Tali: O le faanoanoa loloto lea ina ua agasala ma liliu ese mai ai ae faia le finagalo o le Atua.
2. O le a le agasala a Isaraelu o lo o taua i le tusi faitau?
Tali: O le faatuina lea o tupua i o latou loto.
3. O fea tatou te maua ai afioga a le Alii i nei ona aso?
Tali: Tatou te maua i le Tusi Paia.
4. O mea inosia o loo taua i le fuaiupu e 6, o lo o faatatau i le a?
Tali: O lo o faatatau i le ifo i tupua o tagata o Isaraelu.

PESE: Pese ma Viiga – 134.

A’OA’OGA:

1. Aua le ifo i tupua.
2. Ia moni lo tatou salamō i luma o le Atua.
3. Ua na o le Atua e maua ai lo tatou faamagaloga atoatoa.

.....

ASO SA: 8 NOVEMA 2020

MATAUPU: SUI ALA LEAGA I ALA LELEI

SINI: Ia malamalama le vasega, o le finagalo lea o le Atua mo i tatou; ia savavali i ala lelei po o ala o le amiotonu.

TUSI FAITAU: Kolose 3: 1 – 10.

FESOASOANI MO FAIAOGA:

O le tasi lenei o sini autu o le faaolataga na faia e Iesu mo le lalolagi. Ia faafouina ma suia le lalolagi tuai e fai ma lalolagi fou. O le faamagaloga e suia ai ala leaga ua pa’ū ai le tagata i le agasala, i ala o le amiotonu. O ala leaga, o ala ia o le tiapolo e faaososoina ai i tatou e faia le leaga a o ala lelei, o ala ia o le Atua e taitaiina ai i tatou e faia mea lelei mo lona viiga.

A o le tasi lenei o vaega o le feau a Paulo i le Ekalesia i Kolose, o le savavali lea i ala lelei e tusa ma le Tala Lelei ia Iesu Keriso ua uma ona talaiina atu ia te i latou. I le tusi sa faitauina, o lo o tatala lava le mataupu lenei i le aumai malosai ai e Paulo le nofo ai o Iesu Keriso i le itu taumatau o le Atua. O le faamomoe maualuga lava o le Aposetolo, ia ta’u atu i le au Kerisiano i Kolose; o le taunuuga lava lea o i latou uma e savavali i ala o le Tala Lelei po o ala ua uma ona faasino mai e le Keriso mo i tatou. O le oti faatasi ai o le au Kerisiano faatasi ma Keriso, e le o le oti i la le tino ae o le manumalo aiai faatasi o Keriso ma e savavali i ona ala ma faatoilalo ai le malosai o le agasala. O lona uiga, o le saili i mea i luga; o le savavali lea i ala o le amiotonu. O le tumau i le faatuatua ma saili i le Atua ma le faamaoni, aua o ala ia e faatumauina ai le faatoilaloina o le agasala e pei ona aumaia i mea a le lalolagi. O le apoapoa’i atu ai la o Paulo ia Kolose e fasiotia o latou itu tino o i le lalolagi. E le ina ia fasiotia i latou ma o atu ai i le tuugamau, peitai ia o ese mai i ala o le lalolagi aua o mea ia na ola ai tagata anamua ona o le tuinanau o latou loto i mea e tupu ai le agasala ma faaleaogaina ai le Tala Lelei ia Keriso. O le uiga lea o le upu a Paulo, ia outou toeseina le tagata tuai ma ana amio; ona o mea ua tupu ai le agasala. A ia oofu i le tagata fou ua na iloa le Atua ma le amio faale-Atua ina ia toe atagia ai le ola faapaiaina. E taua foi mo i tatou ina ia tia’i ala o le amio leaga e tupu mai ai le leaga ma faafitauli ae ia savavali i ala lelei aua o ala ia e finagalo ai le Atua mo i tatou.

GALUEGA FAATINO: Tusitusiga

Toe faamatala mai le tala e pei ona faamatalaina i au lava upu i ni parakalafa se lua.

PESE: Tulei ese, tulei ese, avega mamafa uma o lou agaga.....

A’OA’OGA:

1. Ia tatou savavali i ala lelei aua o ala ia o le Atua.
2. Ia faapaiaina i tatou mo le Atua ma lana Tala Lelei.
3. Ia tiai ala leaga auā e oo mai ai le toasa o le Atua ia te i tatou.

.....

ASO SA: 15 NOVEMA 2020

MATAUPU: TAITAIINA E LE ALOFA

SINI: Ia a’oa’o le vasega ia malamalama i le taua o le taitaiina i le alofa faale-Atua, e alofa ai i so o se tasi.

TUSI FAITAU: Ruta 1: 1 – 17

FESOASOANI MO FAIAOGA.

Talofa tamaiti, o le tatou mataupu i lenei taeao, o le *TA’ITA’IINA E LE ALOFA*. E mafai ona tatou faapea o le alofa, o le faavae mausali lea e taitaiina ai le tagata e faia mea lelei mo ia ma isi tagata. O le lagona e tupu a’e i le loto fuatia ifo e lelei e faatino ai le alofa i so o se tasi.

O le tala sa tatou faitauina, o le tala malamalama ua masani ona tatou faalogo ai i le mafutaga a Ruta ma Naomi. O Naomi, o le

sa Iuta a o Ruta o le fafine Moapi. E eseese nuu na tutupu a’e ai ma a’oa’oina ai i laua, e eseese foi tu ma aganuu e faapea foi i talitonuga. O lo o faamatalaina i le amataga o le mataupu lenei le mafuaaga ma le amataga o le mafutaga a Ruta ma Naomi. O le toeaina o Elimeleka ma lana ava o Naomi ma ona atalii e toalua na o i Moapi ona o le oge sa tupu ia Iuta ma nonofo ai. O lea na faiava ai ona atalii e toalua i fafine Moapi, e pei ona iai Ruta lea sa faia ma ava a le tasi o ona atalii. Ua oti Elimeleka ma ona atalii ae tuua na o Naomi ma ava a lana fanau. Ua uma le oge sa i le nuu o sa Iuta na ala ai ona toe tonu i le manatu o Naomi, e sili pe a toe foi i lona nuu aua ua asiasi i ai le Atua. Ua oo i le aso e foi ai o ia i lona nuu peitai ua faigata avā a lana fanau auā ua finau atu ia te ia ina ia latou o ma ia i lona nuu. Ua malie le loto o le tasi e foi, a o Ruta ua finau atu lava ia ia Naomi la te o lava ma ia. O le vaega o le tusi sa tatou faitauina, lea o lo o i ai upu a Ruta na faamalosia ai Naomi la te o pea ma ia. “Aua o le mea e te alu i ai, ou te alu ai foi; o le mea e te nofo ai, ou te nofo ai, e fai lou nuu ma o’u nuu; e fai lou Atua ma o’u Atua. O le mea e te oti ai, ou te oti ai, e tanu ai a’u; ia faapea ona faia e le Atua ia te a’u, ma ia faaopopo i ai, pe afai e tuueseeseina i taua ma oe i se tasi mea se’i vagana le oti.” (f 16, 17) O upu a le tagata ua moni le taitaiina e le alofa, aua o lea ua tautino e fai Naomi ma ona aiga moni, o Iuta o lona nuu ma lona faasinomaga. Ua ia tiai i atua faapaupau o Moapi ae faatuatua i le Atua silisili ese. Ua ia lafoai i lona nuu ma le mea na ola a’e ai ae mulimuli atu i le tagata ese ma lona talitonuga, o lona alofa ua faia mo Naomi e afua mai ai manuia e tele mo ia mai le Atua. E faapea foi ia te i tatou, a moni le taitaiina o i tatou e le alofa, tatou te faia ai mea lelei mo so o se tagata lava e faamanuia mai ai le Atua ia te i tatou.

GALUEGA FAATINO: Uiga tutusa

Tusi mai ni upu o i le tusi faitau e tutusa uiga ma upu o lo o taua.

nonofo	-	(aumau)
toalua	-	(ava)
suafa	-	(igoa)
fusifusi	-	(sogi)
lima/vae	-	(aao)
tia'i	-	(tuulafoai)

PESE: Le alofa o le Atua e ofoofogia...

A'OA'OGA:

1. Ia faia le alofa ma faavae mautu o lo tatou ola.
2. Ia alofa i soo se tagata e pei ona alofa mai o le Atua ia te i tatou.
3. E faatumauina le viiga o le Atua pe a taitaiina i tatou e le alofa.

.....

ASO SA: 22 NOVEMA 2020

MATAUPU: TUMAU IA IESU

SINI: Ia malamalama le vasega, o le tagata e tumau ma talitonu i a'oa'oga a Iesu, e fai o ia ma ona so'o.

TUSI FAITAU: Ioane 8: 31 - 33

FESOASOANI MO FAIAOGA

Tamaiti, ua a'oa'oina tatou i le tatou Aoga Aso Sa, i mea e tele faatatau i la tatou uo o Iesu. O lona finagalo ua aumai i ana a'oa'oga e tele ua tatou iloa, e naunau lava o Ia, ia le gata ina tatou malamalama i ai, ae ia tumau ai foi i so o se taimi o lo tatou ola e ala i le faatinoina.

O le finagalo lava lena o Iesu, e pei ona Ia a'oa'o atu ma faailoa atu pea ia Iutaia, i so o se taimi e lolofi mai ai tagata e fia faalogologo i le Alii, pei foi o le tatou Tusi Faitau o lenei Aso Sa. A o i ai le Alii i le malumalu, e tele mataupu na a'oa'o atu ai o Ia i tagata. Toatele tagata ua talia ma faatuatua ia te Ia. Ua ia fetalai atu foi ia Iutaia, o ē ua faatuatua ia te Ia, *“Afai tou te tumau pea i lau mataupu, o ou soo moni outou.”*

O lona uiga o le tagata e talia ma faatuatua i a'oa'oga a Iesu, ua tumau foi o ia i le Alii, ma ua fiafia e ola e fai ma so'o moni o Iesu. O Iesu tamaiti, o Ia o le puna ma le faapogai o mea moni mo le ola o le tagata. O Ia o le faataitaiga atoatoa o mea tonu ma mea sao i le ola o le tagata. O Ia o le amiotonu, a o tatou o tagata agasala. Ae ui i lea, e mafai lava e Ia ona faasaoloto mai tatou i le tele o a tatou agasala, ona o mea sese ua tatou talitonu i ai, ma faatosina pepelo a Satani i lo tatou ola. E lē aumaia e Iesu ia i tatou le saolotoga, tatou te faia ai mea leaga ua tatou mananao i ai. Peitai o le saolotoga e mulimuli ai ia te Ia, e auauna ma tumau ai i le upu moni, pei ona finagalo i ai le Atua mo i tatou.

Tamaiti, a tatou tumau ma faataitai pea ona tatou ola i a'oa'oga na a'oa'o mai ai lo tatou Alii o Iesu, e le taumateina lava, o i tatou o isi so'o moni o le Alii, ma e tatou te maua foi mea lelei i lo tatou ola. E fiafia foi ma fia uo isi tagata ia i tatou. A'oa'o i tala ia Iesu ma tumau i ai.

GALUEGA FAATINO: Tusiga Fuaiupu

Tusi mai ni au fuaiupu i upu nei:-

1. Iesu -
2. tumau -
3. soo moni -
4. sa'oloto -
5. faatuatua -

PESE: “A tumau ia Iesu”

A’OA’OGA:

1. O Iesu le faataitaiga sili.
2. Talitonu i le Alii.
3. Fultua i le leaga.

.....

ASO SA: 29 NOVEMA 2020

**MATAUPU: E MAFAI E IESU ONA TOE
FAAFOU TATOU**

SINI: Ia a’oa’o le vasega e leai se mea e le mafaia e Iesu, e oo lava i le faafouina o i tatou e avea ma tagata e molimau i le faaolataga na ia saunia mo i tatou.

TUSI FAITAU: Galuega 9: 1 – 9.

FESOASOANI MO FAIAOGA:

Ua tatou iloa ma talitonu ia Iesu, o le Atua liutino tagata na afio mai ina ia militino faatasi ma tagata. O lo o molimau ai foi le au fai-Evagelia i lea tulaga, aemaise o le tele o vavega na fa’aalia ai le mana silisili ese o le Atua na afio mai ma lona Alo. O le mana o lo o i ai le pule aoao a le Atua i mea uma. E le gata i lea, ae ua faailoa mai ai ia te i tatou, e leai se mea e le mafaia e Iesu ona o Ia o le Atua liutino tagata. Ioe tamaiti, o lo o manino lava lea mea i le vai na liua e avea ma uaina lelei i le faaipoipoga i Kana i Kalilaia. O tagata mama’i na faafouina lo latou malosi, e oo lava i temoni na ulufia tagata na usiusita’i ia te Ia; e le gata i lea, ae na Ia toe faatuina mai tagata mai le oti. E pei o Lasalo lea na po fa i le tuugamau ae na toe ola mai.

O le tala sa tatou faitauina, o loo faamatalaina ai le liua o Saulo e avea ma Paulo i le ala i Tamaseko. O Saulo, o se tagata sa malosi lona sauaina o tagata Kerisiano. O lana galuega lea sa i ai, o le alu lea e fusifusia tagata Kerisiano ma ave i le falepuipui ona o la latou molimau i le suafa o Iesu Keriso ma le faaolataga na Ia afio mai ai i le lalolagi. Peita’i ua finagalo le Alii e fa’aaogaina le lototele ma le le fefe o lenei tagata ina ia avatu ai le Tala Lelei i nuu ese; o lea na ia taia ai Saulo i le ala i Tamaseko a’o agai atu o ia e fusifusi i tagata Kerisiano o lo o i Tamaseko. O lo o manino lava i le fuaiupu e 5 o Iesu na valaauiina Saulo ma faafouina o ia e avea ma ave feau o le Tala Lelei i lana tali mai i le fesili a Saulo, “O a’u o Iesu ua e sauva mai i ai; o le mea faigata ia te oe ona aa i tui.” E le o ta’ua foi i le tusi faitau pe faamatalaina le salamo ai o Saulo e tusa ma le la felafolafoaiga ma Iesu. Peitai i le fuaiupu e 9, e tolu lava aso sa le vaai ai ona mata, na le ai foi ma inu. Ua lava lea e ta’u mai ai le salamo o Saulo ina ua ta’u atu ai e Iesu le sese o lana galuega o lo o faia. A fa’aaui le tala ma iloa ai le suia o lona igoa mai ia Saulo ia Paulo ma avea ai o ia o se tasi o Aposetolo malosi i le Tala Lelei ia Iesu Keriso.

Ioe tamaiti, e leai se mea e le mafaia e Iesu auā o ia lava o le Atua liutino tagata na afio mai ina ia laveaina i tatou. Ua faailoa mai ai i le tala lea le silisili ese o le mana o Iesu na te mafai ai ona faafouina le tagata tuai e avea ma tagata fou ma fa’aaogaina ai i tatou e fai ma ave feau mo ia ma lana Tala Lelei.

Uiga o Upu:

- i) mapugatamai: ita, naunautaiga o le loto e faaoo le sasa i e ua ita i ai, le malolo e fai sauaga.
- ii) sunako: o le fale lea sa fa’aaoga e Iutaia mo latou tapuaiga po o le falesa i nei vaitau.
- iii) nisi o le Ala: o le igoa lea na faaigoa ai tagata Kerisiano i lea vaitau.

- iv) a'a i tui: o se aga, po o se amio matuia e tetee ai i se isi tagata po o se pulega. Faatautee.
- v) mafeganavai: fetautalatalaa'i, femusumusua'i tagata i se mea ua tupu.

GALUEGA FAATINO: Faavasegaga

Faatulaga sa'o mai faaupuga nei i lona faatulaga sa'o e tusa ma le talanoaga a Iesu ma Saulo o lo o ta'ua i le tusi faitau.

1. Tu ia oe i luga, ina alu ia i le aai, ona ta'uina atu lea ia te oe o le mea e tusa ona e faia.
2. O a'u o Iesu ua e sau mai i ai; o le mea faigata ia te oe ona a'a i tui.
3. Le Alii e, o ai ea oe?
4. Saulo, Saulo e, se a lea mea ua e sau mai ai ia te a'u?
5. Le Alii e, se a le mea e te finagalo i ai ou te faia?

Tali: 4, 3, 2, 5, 1.

PESE: O le Atua silisili ese, e malosi ofoofogia.....

A'OA'OGA:

1. Ia faafouina o tatou tagata mo le Tala Lelei ia Iesu Keriso.
2. Ia aua nei o tatou a'a i tui i le Atua ma lona finagalo auā e oo mai ai lona toasa.
3. E leai se mea e le mafai ona faia e le Atua.

.....

ASO SA: **6 TESEMA 2020**

MATAUPU: **O IESU I LE FALE O MANU**

SINI: Ia a'oa'o le fanau ia malamalama o le soifua mai o Iesu i le fale o manu, o lo o aumai ai ia i tatou ni a'oa'oga taua, i lo tatou ola.

TUSI FAITAU: Mataio 2: 1 – 12

FESOASOANI MO FAIAOGA:

O le mataupu o leni Aso Sa, e le o se mataupu fou mo i tatou le fanau. E le misi lava i so o se tausaga aemaise o le vaitau leni e faamanatu ai e le lalolagi atoa le Afio mai o le Atua e ala i le Pepe o le Kirisimasi, o Ia o lo tatou Alii Faaola, o Iesu Keriso. O fuafuaga alualu mamao a le Atua mo le faaolataga mo le lalolagi agasala. Ua leva lava ona valoia mai e Perofeta o le Feagaiga Tuai le soifua mai o le Alii Faaola (Mika 5: 2), i le vaitau a'o tulai mai Herota le tupu sau. Na faateia Herota ina ua oo atu makoi e saili le nofoaga o lo o soifua mai ai Iesu. Sa fesiligia e Herota ositaulaga ma a'oa'o tulafono pe moni le tala na ave atu e makoi, ona latou tali lea i ai sa valoia lava e Perofeta le fanau mai o le Mesia i le aai o Peteleema. O le ala lea na poloa'iina ai e Herota makoi e o atu afai latou te maua Iesu, ona tau atu lea ia te ia sei alu atu ai e ifo ma vivii ia te Ia. Ae peitai o lona manatu e fia fasiotia ia Iesu. Na ta'ita'iina lava e le fetu makoi i le nofoaga tonu na fanau mai ai Iesu i le fale o manu. Sa o latou ifo ma vivii ma ave a latou meaalofo mo Ia. Ona toe foi ai lea o i latou i le isi auala e le'i iloa e Herota.

O le soifua mai o Iesu i le fale o manu, o le faailoga lava o le Afio mai o le Atua i se ala maulalo. Sa mnatu lava tagata Iutaia o le Mesia o lo o faatalitali i ai o se Mesia e pei o se tupu malosi

e mafai ona lavea'iina i latou mai le pule saua a le malo o Roma, peitai e ese lava auala a le Atua mai manatu o tagata e toatele. E tele lava ni a'oa'oga taua i le soifua mai o Iesu i le fale o manu, e le gata o le momoli mai ai o le feau o le loto maulalo, agamalu, avanoa mo tagata uma, e le fia malualii, po o le lē fia faailoaina sona mamalu, o Ia o se auuuna mo tagata uma, ma isi lava a'oa'oga taua e mafai ona tatou maua i le soifua mai o Iesu i le fale o manu. Ia faapea foi tatou ona o tatou fa'aaoga ma ola ai i a'oa'oga uma ua aumai e Iesu mo i tatou.

GALUEGA FAATINO: Faatino le tala i makoi

PESE: Vaai i le fetu mai Sasa'e
(Pese Kirisimasi)

A'OA'OGA:

1. O Iesu o le fetu pupula a le Atua
2. Fai sau meaalofa mo le Alii.
3. O Iesu le tupu ua fanau mai.

.....

ASO SA: 13 TESEMA 2020

MATAUPU: SE MEAALOFA SILI MO IA

SINI: Ia a'oa'o le fanau ia fiafia e ofoina atu le ola ma le malosi, e auuuna ai mo le Alii, aemaise ia alofa atu i ē o fia maua le fesoasoani.

TUSI FAITAU: 1 Peteru 4: 7 – 11

FESOASOANI MO FAIAOGA:

Ua tatou i ai i le masina mulimuli o le tausaga, ua toe foi o se aga, po ua lē o toe umi ona tatou faamanatuina lea o le aso Kirisimasi. E toatele lava ua naunau sei vave oo mai ia le Kirisimasi auā o le aso e tele ai meaalofa e maua. Faapei foi ona o atu makoi e ave a latou meaalofa mo Iesu ua faapena foi le toatele o i tatou i o tatou aiga e fai meaalofa isi i o latou matua, o aiga faapea foi ma a latou uo.

O lo o aumai i le tusi faitau o le tatou mataupu o lenei Aso Sa ni apoapoaiga eseese a Peteru i tagata Kerisiano o e ua faasalalauina solo i Asia itiiti (Asia Minor) ona o le malosi o sauaga a le malo Roma ua faasauaina ai i latou, aemaise i Ierusalema. O apoapoaiga a Peteru i le au Kerisiano ina ia vaai toto'a ma ia tumau i le faatuatua faamaoni, auā le toe afio mai o Iesu. Ia fa'aaoga tatau taleni ma agavaa, o meaalofa mai le Atua e agalelei atu ai ma alofa atu ai i ē o mafatia ma fia maua le fesoasoani. Ia atagia i a tatou auuunaga le alofa o Iesu, ina ia viia ai le Atua.

Tamaiti ia tatou manatua le alofa moni o le Atua mo i tatou, lea na tuua ai e ia lona mamalu ae ua Afio mai i le lalolagi o lana meaalofa silisili lea mo i tatou, na ia ofoina mai lona ola e togiola ai i tatou le fanau agasala. O le fesili, a o le a se tatou meaalofa mo Ia? O le tali, ia tatou ususita'ia ma faia lona finagalo e pei ona taua e Peteru, ia tatou alolofa atu i o tatou uso vaivai o fia maua le fesoasoani, fa'aaoga a tatou taleni ma agavaa faapea lo tatou malosi e auuuna ai mo le Atua ma agalelei ai i ē o mafatia ma fia maua le fesoasoani.

Tatou te mafaia ia mea uma pe afai tatou te mataala ma tatalo i le Atua, o Ia tatou te malosi ma tatou mafaia ai mea uma.

GALUEGA FAATINO: Taliga fesili

1. O le a se meaalofa sili e te fia ofoina atu mo le Alii?
2. O a meaalofa o lo o taua mai i le tusi sa faitauina?

PESE: Ave lou ola ia aoga

A'OA'OGA:

1. Ia fiafia e ofo atu le ola ma le malosi e auauna ai mo le Atua
2. Ia alofa atu i e o fia maua se fesoasoani.

.....

**IA MANUIA LE KERISIMASI
MA LE
TAUSAGA FOU 2021**